

周
易
宗
義

時多受易讀本義稍、觀解義之
指歸竊謂天道人事存亡吉凶規矩
準繩方圓平直左之右之惟逢之
源時不時義、不時時故曰六位時成
夫義則時之別解也從之集之得孔
孟之真烏紫陽見其合曰象也者像

也理之似莫如義與陰閑與陽閑先
天後天皆是物也蓋王瞿楊何者流
斤_三守其師說即躋之六通四闕往
古來今猶將固壘一隅望洋一面焉
弗為之矣說者猶謂程傳主數朱義
主理夾原本法象根極性命闡玄繹

幽惟謂理數可岐傳義可兩也小子時
嘗謂程先生曰孟子善用易者義也
先生沈潛易義蓋一生之精力殫焉
編摩大觀抽矢獨睹是書之成名曰宗
義夫其得義得時得時得象矣蓋孔子
思夏殷之禮曰杞不足徵也有宗存焉

夫杞宋之於周也纖矣孔子神聖豈不
能一人了隆夏殷政謂世遠言湮世
不乏奇智之士每援引上古托為一
家之吾言其傳奇智言其以是則孔
子之所大慮也易自江左玄虛蓋已降
而班於老矣今學士侯易輒曰吾心有

義皇則默成象也不幾為釋氏窟穴
耶又不則竄入百家之術數矣先生曰
紫陽之義則義皇之祀宋也吾宗義
以傳之庶二氏之百家之者其無所托
耶噫世有神明默成者知其必以先
生之義為徵也已

周易宗義序

程師向令禹杭為嘉惠諸生也則出
易義一編示之吳得泂諸生後受讀
也則見其奧衍淵密若不泂一豕一犬區
徑上索者間嘗請諸先生先生復為
出一編則自咸以下三十四卦大都折衷
羣儒合之一貫網收櫛比妙析絲棼若

圓宗規方宗矩蔑有與者時先生擢苗
都司寇尚書郎業已戒行莫能竟今奉
夏比來謁則茲宗義梓人已告竣矣先
生復悉出原稿示吳銘硃錯讎甲乙互
筆且曰吾稿且三易矣子可無為我言
之吳敬謝不敏退而深惟之夫易之作以
為道也畫不足而有象之不足而有文之不

足而有文、有十翼、不足而有古註
疏、古註疏不足而有程傳、有本義傳、本義
不足而有百家、出而易、愈析、愈發、先
生不得已而有宗義、先生名曰宗、不在易
也、易者、吾心變化之名也、一陰一陽之謂道、不
測之謂神、生之謂易、也、道也、神也、何也
曰、心也、心原經而顯義、其悟性不在經也、如

火麗木而有形其然性不在木也心有貫乎
萬止於一者謂之宗昧其宗則辭且不足
以盡言也而何況於象得其宗則糟粕煨
燼無形妙義即註疏百家昌有盡出焉故
其取之博也以為約也寓之閑也以為精也
探之奧也以為顯也要以見易於心隨枝疏
却解而未始出吾宗非先生寧有法乎吾

夫子之贊易也。乾表自強。坤著厚德。於龍
德則揭謹信。於直方則標敬義。夫豈戒指
於伏羲。稟說於文王。受詁於周公。哉。獨得
其宗。故也不然。將天行何以法。乾地勢何以
法。坤。其說龍德。以為靈恠。不可窺覩。物
而直方者。以第為虛揣之形容。而脩詣無
功。證入無路。則易也者。不幾為蒙首區尾。

之迷誤乎而世之學者方且根瑣屑躋曾不
能於文字外深索厥旨而第曰易者經耳
夫經之所陳者皆後天也在吾心則先天也
倘伏羲之後更有伏羲文王之後更有文王
周公之後更有周公孔子之後更有孔子
當不僅止此是也吁此宗義之所以作也管
公明之不言易似矣而遺其理習其數傳

所載大抵如識緯家言以書後之一中而已嗟
夫易也者聖人以為趨吉避凶之書而管子
以為莫能趨莫能避之書也與夫不究其理
而徒數之習未有不流於曲術者也若夫居安
樂玩易以知陰陽以知阻潛不敢見惕不敢躍
飛不敢亢即未探策問兆而惠迪考祥之原已
定命於一心矣豈僥倖於射覆而以冥之決哉

故漢人明經主通大義若董子之於春秋匡生
之於詩類能於全經中揔其條貫耦變應節
迴環宛轉而不窮彼未得其宗者而猶名是而
以如先生之於易者乎先生之令禹杭也為比
之初六今在司寇也為噬嗑之九四夫盈虛以孚
之黃矢以貞之善用易者豈必不言易也書曰江
浮朝宗於海而記曰先生之祭川也皆先河而

後海或原也或委也此之謂務本夫原以為
本往莫可窮也委以為宗來莫可測也吞天
浴日不見其盈歸虛尾閭不見其涸有本者
如是之宗爾朱子探本以合宗先生立宗以
會本之義宗義其為見易於心一也易道庶
其復明矣乎昔文中子之擬經也咸嘆其備
而我明王伯安氏獨謂其良工心苦有能知

五
文中之苦心者乎則謂先生之三易即夫子之
三絕可也敬以復諸先生先生殆不得辭予
言矣

萬曆己酉季夏禹杭門生姚星吳百頓首書於
金陵鷄鳴山之麓

題程敬承先生周易宗義叙
吾邑程敬承先生幼有慧識
長而端凝落筆驚人弱則就
試甚為有司所器聲名大噪數
奇不售淹庠序者廿餘年歲

占高壽負笈從遊之士連郡跨
邑不下數十百人皆以經義來
學家世治易故以易著嘗言易
教精微而爲俗學割裂上者
玄虛下者煩碎不有統一愈

晦聖真以故頻年掩關覆策
凝思務窺未画而取證於百家
同異其要則以紫陽為宗至旁
叔曲引黑白燦然闢荆榛而歸
大道諸生著蔡奉之拱壁護

之發而為文人、洞極旨趣無支
無詭望之知為程門弟子多有
樹幟文場巍然青紫者而先生
亦遂捷兩闌握綬親民斗城游
刃手多新構前笑散棄不收稍

遷南比部在公多暇偶檢故篋
得之慨然有遺簪墮履之歎重
理篇帙復加參訂以推教席所
董爰作多士司南題名宗義醒
之覺路及人王于蕃私請命剞

劇予方承乏畝臺竊得寓目曰
記曩時挾徑問難世往時移已
是三十來年今煥然還舊觀又
憶與先生同事浙藩陲隕邑令
涼踣寘諧其間炎燠升沉日更

萬變而先生無幾微見顏面今
以成果熟夷猶白雲先生愛之
怡然屈伸進退無之不可先生
之於易深矣詎止掇拾言詮取
辦括帖云尔哉予初亦習易而

年少鹵莽未涉其藩已復冒
薦此後蹉跎六舉辛苦一第
風塵營營敝帚視之鷺得先
生繕稿展卷茫然邈爾河漢
孰與先生質疑送難互暢宗

奧如曩者一往破的不足任已
故乘先生之請聊為粗述游歷
及所勤梓人之意令覽者得考
其世若云易在畫爻善易不
言則予与先生皆贅也不乃

有先生心易在

己酉七月之望爰弟汪懷德

夢得父書

刻周易宗義凡例

一是集立說並以文公先生本義爲宗尊

時制也間有異同亦其傳信傳疑可備參考者耳

一是集所采多出晉魏註疏宋儒傳錄及

國朝大全近來名公解說因原文也間有私附亦據所見
聞以折衷就正耳

一卦爻取象止把正體推求何等簡易其互體原係漢
儒增出雖不甚悠謬而未必無穿鑿瑣碎之病間存
一二以同志者共商之

凡例

黃虞稷曰汝繼字志初婺源人萬曆辛丑進士官袁州府知府朱竹垞經義考錄之有朱之蕃序此本未見可補書

周易宗義卷一

星源後學程汝繼敬承甫輯

上經

天地定位而易行乎其中矣故文王之易首乾坤山澤
通氣故下經首咸雷風相薄故次恒坎水也離火也既
濟未濟水火互也水火不相射故上經終坎離下經終
既濟未濟

洪覺山曰易變易也六十四卦本自伏羲而謂之周易
者以夏連山首艮商歸藏首坤自文王更定而繫彖周
公係爻而後易之用始大孔子十傳皆所以推明贊嘆

乎此者耳、故別之以著代也、易之興也、其于中古乎、若夫係辭則夏商之時、固已有爲之者矣、觀古傳所載可知也、

胡雙湖曰、經分上下、誠有至理、上下經雖有三十卦三十四卦之不同、以反對計之、各十八卦一也、上經反對五十二陽爻五十六陰爻、下經反對五十六陽爻五十二陰爻二也、上經以四正卦爲主、首乾坤而終坎離、與先天圖南北東西四方之卦合、下經以二變卦爲主、震變爲艮、巽變爲兌、首咸恒而終既未濟、與先天圖四維之卦合、而坎離之交不交、亦可見伏羲先天圖備見於

文王序卦首尾中三也若是者豈以竹簡重大之故耶

乾三三

乾上坤下 三三三三

坤上

陸庸成曰乾六爻皆爲龍坤合卦乃爲馬故乾爻曰六龍坤馬曰地類然則龍馬負圖之說有取于龍馬以其爲天數地數卽乾之龍坤之馬也出於河天一生水而地二成之也蘇子曰變化而自用者龍也馴服而用于人者馬也故乾坤象焉

乾元亨利貞

潘雪松述曰乾健也天之體以健爲用運行不息應化無方此天之自然之理聖人作易欲人法天自然之象

而施人事元亨利貞乾所繫之辭也以贊乾之無所不
統而此四字於六十四卦無所不貫季彭山曰凡易中
卦爻所主有重於發揚者則但言元亨有重於收斂者
則但言利貞惟乾則陽剛不已無一毫陰柔之雜所謂
純粹精者也故四德渾然相爲體用而其行則由元達
亨復斂利以歸於貞非若他卦陰陽有偏勝也 陸庸
成曰元亨利貞作四德照文言可知然元爲之貫惟乾
四德備焉純粹精矣諸卦即兼此四字者餘加一字即
不渾全故與其四字備而未純不若偏而獨舉亦有偏
舉而雜見亦有全無而純疵故分有者得四卦焉大有

之元亨大壯之利貞鼎之元亨利貞之亨利貞是也全有而雜舉者得五卦焉屯隨臨无妄革是也全無者得七卦焉觀剥晉姤革艮歸妹是也其偏舉而雜見者皆然唐凝菴曰乾者健也大極動而生陽其性本動兩卦相承純陽用事有周流循環運無停機之象其健至矣故曰乾何以言健也以元亨利貞言也元者生機也生機之暢達爲亨生機之充足爲利生機之正而且固爲貞蓋陽主發生六畫純陽則生機饒裕生生不已人得之爲人物得之爲物旣以之自生亦以之生生其爲亨利貞悉取足于此矣故自元而貞固乾之一始終貞下起

元則始而終終而始蓋未有紀極矣此乾德之所爲健也胡雲峯曰本義云一奇也陽之數也從象上說乾健也陽之性也從理上說大通而至正此天理之本然大通而必在正固此人事之當然也

蔡虛齋曰天地間凡柔者皆不足以有爲惟剛健則能有爲況乾又是至健者此乾道之所以爲大通也凡物之剛者必正柔者必邪乾則純陽至健又正之至者也程敬承曰元亨利貞是聖人事合下便是元亨合下便是利貞非謂元亨了又必利於貞也夫不貞何以得元亨乎

初九潛龍勿用

按乾體純剛象龍初始伏於地下象潛孔疏初九潛龍此自然之象易以時爲大時在潛便當勿用龍之爲物靈變不測此言潛者晦養以俟時也二見五飛皆初之潛者耳

程敬承曰易卦首乾易文首乾初而劈頭稱一潛字何也氣先專翕心初微隱潛字中凝蓄許多變化端倪聖賢大學問大事功俱自潛出耳即如龍見惕躍飛神靈不測非以潛耶潛之精神不露故曰勿用非兀然一無所用也無用之用用之所以爲妙也紫溪曰潛便勿用

不潜便輕於用矣。陸庸成曰：初地道之始，故曰潜三
人道之始，故曰君子。五天道之始，故曰天。示則也。龍以
不見爲神，其能見能惕，能躍能飛，皆在于潜，故勿者我
勿之也。毋微露其可用，而使人物色也。勿之，精神其孰
能窺之。唐凝菴曰：陽性躁急於有爲，故以勿用戒之。
亦以蓄其生機而厚發之也。

胡雲峰曰：乾初象潜龍，護微陽也。坤初象履霜，防微陰
也。於陽之微，則恐其或用，勿也者，禁之之辭也。於陰之
微，則慮其必盛至也者，危之之辭也。

九二見龍在田，利見大人。

潘雪松述曰、出潛離隱故曰見龍、初與二俱爲地道、二在初上、所以稱田、見龍在田、是自然之象、註稱田之耕稼利益及於萬物、陽氣發動見於地上、尤莫如田、故以爲象體陽宅中、德施周普、天下利見此大德之人、莫不蒙其利益焉、纂言曰、陽爲大陰爲小、凡三畫中爲人位、九居二象大人利見、卽有相與行其德之意、非徒觀見之而已、大抵龍德大人自是上下同利者、五二利見同、陸庸成曰、遯世曰潛、出世曰見、天下有道則見、見猶未得位、以時當用、出而聽人之用、故在田也、大人惟九五、五之利見、臣民共焉、此獨於二當之者、與五應故

耳

九三君子終日乾乾夕惕若厲无咎

潘雪松述曰象旨鄭玄以六畫言三於三才爲人道有乾德而在人道君子之象也下乾終而上乾繼故曰乾乾居下卦之終有終日而夕之象惕謂悚惕鄭玄曰懼也

蘇子瞻曰九三上下之際禍福之交成敗之決也其濟不濟間不容髮是以終日乾乾至於夕而猶惕若雖厲而无咎也王註謂九三爲動心忍性之學而能補過者是也

程敬承曰終日乾乾非第空自憂懼而已言每恒終竟此日合上乾下乾而健以行之無息不體此乾故曰乾乾乾自不已體乾者自不息如下文所謂反復道是也連用二乾字卽如繫辭連用二存字

陸庸成曰乾天下之至健也德行恒易以知險險莫如三四之地故僅曰无咎然人事之得莫大於无咎而吉次之故乾六爻不言凶亦不言吉純粹之中雜一吉字亦不得也有吉便有凶對矣吉以歆善非純乾可用也故人道備於三四止曰无咎噫可以无大過其聖人乎王伯厚曰危者使平易者使傾易之道也處憂患而求

安平者其惟危懼乎故乾以惕无咎震以恐致福

九四或躍在淵无咎

朱子曰淵雖下於田田却是個地淵則空虛无實之處通乎上下一躍即飛在天夫既言躍則不復在淵矣猶曰在淵者四或躍乃應初在淵而起其進也易所謂一躍便上至於天也

潘雪松述曰已離下體故謂之躍以陽居陰故謂之淵九四陽氣漸進乾道變革之時龍之潛者至是躍上矣時躍而躍自然之象或躍在淵不敢必躍而遽離於淵也淵龍所安也在淵故能變化飛騰易安身而後動密

慎如是故无咎无咎還重進邊

蘇子瞻曰下之上上之下其爲重剛而不中上不在天下不在田者均也至九四獨躍而不惕何哉曰九四旣進而不可復反者也退則入於禍故教之躍其所以異於五者猶有疑而已三與四皆禍福雜故有以處之然後無咎纂言曰見龍在田者謂已見而在於田飛龍在天者謂已飛而在於天皆言其已然故爲已定之決詞而稱龍或躍在淵謂將躍而猶在於淵蓋言其將然故爲未定之疑詞而稱或

九五飛龍在天利見大人

潘雪松述曰六畫之卦五爲天三畫之卦五爲人九五陽氣盛至於天故云飛龍在天蘇子曰飛者龍之正行天者龍之正處王註以九居五龍德在天則大人之道亨也夫位以德興德由位叙以至德而處盛位萬物之覩不亦宜乎敬仲曰二五咸言天下之利見其有居二五之位而天下不利見之者非大人也皆尊仰之之謂見皆蒙其澤之謂利

上九亢龍有悔

潘雪松述曰窮高曰亢陽在上乾體旣備上位旣終故曰亢龍劉濂曰陽極盛而陰生龍旣飛而思潛此自然

之理故曰有悔重剛而亢時之所宜也乾道常不息故必有悔龍神物也能與細細能與巨巨能與高高能與下下故曰龍變無常能幽能章亢而有悔龍德之與時偕極而不失其正也

程敬承曰六爻始乎潛終乎亢而乾道豈遂以亢終此時有復歸潛之機焉而其妙在悔識時通變之術從有悔得也陸庸成曰悔猶天心之復也物不可窮故受之以悔 總論胡雲峰曰勿用禁之之辭利見幸之之辭无咎謂如此而後无咎勉之之辭有悔憂之之辭觀乾一卦大槩可見矣 李氏曰乾陽物也消息盈虛有時

龍陽類也、潛見躍飛、亦有時、聖人龍德也、升降進退、亦有時、爻序可知矣、

用九見群龍无首吉

潘雪松述曰、劉瓛曰、總六爻純九之意、故曰用九也、王註、九天之德也、體乾聖人能用法德、乃見群龍之義焉、見群龍無首、著六虛之用、用其虛也、敬仲曰、用九之道、雖見於各爻、諸陽而不見其爲首、不見其爲首者、潛見惕躍飛亢、當其時、乘其物、斯用之、不見其首也、意慮微作、則爲已爲私、好剛好進、安得而不爲首、洪覺山曰、易道以中爲至、用九用六、用中也、九即爲中、非九極而

變乃中也一中純然無始無終故曰无首 陸庸成曰
乾陽惟能變故亢復爲潛終則有始非有始也無終也
乾之四德迭用不已故貞下起元非元始有也老子曰
隨之不見其首得無首之說矣至此曰吉其爲占者開
鼓舞之門乎 唐凝菴曰六龍各極其盛並不言吉必
至无首方吉甚矣龍德之貴全也 楊止菴曰乾爲純
陽爲吉乃六爻不言吉至此統而言之者何也初勿用
吉莫先於知幾也二五利見吉莫大於見大人也三四
重剛无咎善其補過亦可趨吉也上九亢極有悔悔極
能知變亦吉也乾陽主動此六爻皆吉詞爻不言故於

此總結處統言之也。又曰：剛貴變動，皆變動故皆得吉。惟乾剛太陽變動。

游廣平曰：乾以純陽陽極而亢，坤以純陰陰極而戰。如其不變，則亢而災，戰而傷，不能免也。乾用九則陽知其險而變，故无首吉；坤用六則坤知其阻而變，故永貞利。項氏曰：乾主知，故曰見言吉在見此理也；坤主行，故曰利言利在行此事也。

彖曰大哉乾元 全

程敬承曰：凡天下之有始者，未能爲始也。乾惟无首，故能資始。始者終之始也，故曰大明終始，終始時也。語六

位爲時成語六龍爲時乘時終時始是爲無終無始此
乾道之變化也各正保合變化之時時至利貞物盡還
元而乾之始物者肇焉故曰首出卽從无首中出也聖
人體元首出庶物則終始惟時變化在我而萬國咸寧
矣程傳曰元大也在天爲始物在君爲首物之德也大
明終始一句是此章大關鍵御天首物非大明者能之
乎

潘雪松述曰彖斷也斷定一卦之義也乾者純陽天之
象觀乾之始以知天德故曰大哉乾元元氣之始也陽
氣初動太和氤氲萬物悉資之以兆始也一始萬始而

生而成天之發育皆總於乾元故曰乃統天天者萬物之總名物何始始於天天何統統於元姚承菴曰天生生不息而元之初動直貫終始而不息是盡天之造化皆此元之統括也故曰乃統天乃字承資始來見其始直貫於終而終又爲始故下有終始之說

程敬承曰元者萬物所資以始也原自無始亦復無終春而冬冬而又春總是一個發生之氣貫通其間故曰統天惟資始乃爲統天惟統天乃見乾元之大也陸庸成曰元卽太和之氣載性命而出之者也元無始就萬物所資以始乃見元也天道之下濟其可見莫如雨

然資始曰萬物流形曰品物始猶渾淪形可區別也

蔡虛齋曰形對氣言資始時還是氣到這裏方有形却又在資生之後資生者胚胎於中流形者呈露於外

胡一川曰品物流形是言資始之元氣流通於形質之中不可死殺講在物上去恐說在坤的了大抵乾主氣上說坤主形上說

流如水之流由此而條至彼也

潘雪松述曰陽大陰小陽明陰暗大明者乾之體終始者乾之運大明終始一伏一見一躍一飛皆乾道之自然也故六爻之位隨時渾成而六龍載焉六位皆龍而乾德乘之升降無常惟時所用以控御天體所以運動

變化不息也章氏曰大明終始貫資始流形變化各正而言見乾德之無端矣曰時成曰時乘惟其時也

程敬承曰不曰始終而曰終始以元之始起於貞元本不爲首也由終而始又由始而終變化不息故曰乾道變化六龍之變化也此由元亨說到利貞而貞則還元是終又復爲始矣所謂終萬物始萬物此終始之說也大明終始非心通變化者孰能之

王汝仲曰良知者氣之靈謂之乾知亦謂之明德大明終始明乎此而已洪覺山曰明者知也乾知也御者行也天行也然不曰行而曰乘曰御者上下進退之時其

幾在我耳。耿開封曰：統天言乾之體，御天言乾之用，統如身之統四體，御如心之御五官。唐凝菴曰：總之六爻也，或謂之位，或謂之龍，何也？析其六爻時有各當不得，緘毫出入，故謂之位；總其六爻時當變易不得，緘毫膠滯，故謂之龍。蓋位者一定不可踰之名，龍者萬變不可擬之物。執其至一者以貞，位執其不一者以應。時彼位本因時而定，我亦因時而乘，則統天者在我，天地之猶有憾者，我得以先後而左右之。夫是之謂御天。蔡虛齋曰：此條時字最重，蓋大明終始是聖人洞知得乾之四德終而復始一時焉而已。六位時成，則見得卦。

之六位始於初而終於上者亦時焉而已。至於時乘六龍以御天則其潛見惕躍飛亢應受而不窮者亦時焉而已。此一節之大旨也。于孔安曰乾道變化只從元亨說到利貞處各正保合二句不可平大凡萬物之生必具此理而後有以成其形至於成形質而物之生理全矣保合大和從各正上來。潘雪松曰六龍六氣之運乾元乘氣不爲氣所乘故曰乾道變化陽變而陰復化而陽一進一反舒歛以時各正保合是乾之德能各正物之性命以保合此太和一元資始之氣凝聚於形質之中而返一无迹也是乾之利貞也性生之理命生

之氣太和則元氣之生生者貞以含元而又開萬物之始天地生生不息者保合太和也陸庸成曰資始之時理隨氣具由變而化氣隨理足故物物之性命各正不偏便保合太和太和即資始時一元之氣也性命原合太和而來惟各正故保全而復相合也山物乃見乾之利貞吳因之曰化即利貞二字唐凝菴曰總之生機旣謂之元復謂之和何也元氣即和氣自其資始故謂之元和氣即元氣自其欣合則謂之和總之爲物而或以萬言或以品言又或以庶言何也萬明其數之多品見其類之異庶言其生之同各有攸當也

按性命太和共是萬物資始時所受於乾元者各正保合亦非兩時事如五穀至堅實時生意毫無滲漏是性命得其爲性命也此無滲漏處便覺韜藏秘密一團太和元氣飽飽滿滿在裏面了故曰保合 洪覺山曰太和者性命之懿也各正性命以保合凝聚其懿爲資始之端是天道之利貞所以終於元而始于元者也流形變化之交役坤戰乾勞坎之際非剛健無息者不能故復揭乾道言之而曰乃利貞夫子之意深矣

程敬承曰聖人旣從元亨說到利貞又從利貞說歸元上去而曰首出首卽乾元所謂始也聖人體元以統天

之道治天下其間乘龍妙用只此元初生意直貫到底
故總歸之乎始物而曰首首萬物者終萬物者也所謂
乾道之變化乃乾元之變化也萬化歸元故萬國寧也
游讓溪曰寒暑相易收生相禪乾道之變化也而萬物
各正其性命以保合太和聖人首出庶物其道由是也
弘敷五典式和民則非能爲物作則也止之各於其所
而已是以萬國各得其所而咸寧

楊氏曰大哉乾元何大乎乾元也乾之大者以元而大
也何謂元曰是不可言也其陰陽木形之初乎肇而一
謂之元一而二謂之氣運而无息謂之道融而无偏謂
之和天非和不立物非和不生莫之令而令其和者曰

命莫之尊而稟其和者曰性。孰爲此者。乾之元而已。故萬物衆矣。資取於此而後始。天大矣。總統於此而後立。性命妙矣。保合於此而後利貞。其變也。新故爲無常。其化也。消息爲無迹。謂有物耶。雲行雨施。莫見所自來。謂無物耶。品物流形。何爲而有是象。其物之終乎始而終而始。始而復。始終而復。終始終變。化而未已。此陰陽不測之妙也。曷爲變。曷爲化。是不可勝窮也。試觀雲行乎天。而黃黕而蒼。此雲行之變也。倏而有忽。而亡。此雲行之化也。變者迹之遷。化者神之逝。天地造化皆若是而已。大明於終始之道者。非作易之聖人孰與於此。是故體此道以居。乾爻之六位。則時行時止。而聖德成。執此道以乘乾之六龍。則時飛時潛。而天位正。此其所以首出庶物。而萬國咸寧者歟。

象曰：天行健，君子以自強不息。

洪覺山曰：強健也。陽也。上下皆陽。故不息。君子體之所。以法天行也。天行者。自天行也。克伐怨欲不行。則非自

天矣故不與其仁是故乾元資始自天也自強也三月不違仁是也

程敬承曰天之健正於行處見得人之健亦於行處見得君子行此四德始而終終而始乃所謂自強不息也此心有一息不行卽非天行天行爲行則天亦自我御矣要以自體卽健體自強乃真強非純乾君子孰能之章氏曰只自強不息便是乾便統天御天潘雪松曰自強者體乾之象不息者體重乾之象 吳一源曰生生不息者天之德行行不息者天之象惟生生不息乃所謂元也君子法之自強不息法其行行不息者乃所以

全其生生不息之德也 楊止菴曰不息則天有息則
人天人之分係於一息幾微如此

潛龍勿用陽在下也

洪覺山曰龍陽物也初九下也在下勿用所以養陽也
見龍在田德施普也

澤物在德而曰德施普在田故普也胡雲峰曰提出一
德字卽君德

終日乾乾反復道也

程敬承曰上下皆乾乾乾之象道卽乾道也乾道不可
一息不行終日乾乾反復行此道耳

或躍在淵進无咎也

荀爽曰陽主於進或躍在淵則無必進之心故曰進无咎 汪咸池曰加一進字斷其疑也

洪覺山曰用則澤及天下不用則修身見於世此聖人中正全體之學如三之乾乾四之或躍則若有未全者然龍德無不善故乾乾或躍所以求全也

飛龍在天大人造也

程敬承曰語稱天地曰造化曰大造造者天之爲聖之事也聖人居天位行天道所造於天下萬世者大矣故曰大人造也

亢龍有悔盈不可久也

洪覺山曰亢盈也知悔故不久也

程敬承曰亢亦時之不能違者處亢之道在不盈耳盈虛迭用易之所以變通而能久也

用九天德不可爲首也

約說曰經言無首傳言不可爲首爲人之用九者言也非謂天德不可爲首也呂氏曰乾者萬物之首非有心於首萬物也雖有首而實未嘗爲首也老子竊窺無首之義而曰後其身而身先居其後乃所以致其先跡雖不爲首心實爲首也觀此可知易老公私之辨

蘇紫溪曰天德不可爲首以天德本無首也天之氣有首有尾故歲以春爲首日以朔爲首而德則渾渾全全引之莫知其始要之莫知其終更無可爲首也使天德而可爲首則分六龍爲六截豈成片段用九者全體天德如環無端聖人之自強不息不過如此耳

文言曰元者善之長也亨者嘉之會也利者義之和也貞者事之幹也君子體仁足以長人嘉會足以合禮利物足以和義貞固足以幹事君子行此四德者故曰乾元亨利貞

程敬承曰元亨利貞四德雖有分屬要以一元爲主元

者本來生生大德。萬善之所始也。嘉卽善之通。生機發越。物物休暢也。利卽善之宜。生理充足。物物各得也。貞卽善之成。生機完固。物物歸根也。故體仁者。德完其所大生。嘉會者。禮合其所自始。乾始之利在我。故可以利物。資始之脉。於此收藏。卽於此培植。故足以幹事。總之自元而貞。復自貞而元。一元生生不已。君子之行四德。亦生生不已。只一體元盡之矣。

潘雪松述曰。文言以天之四德。屬於人性。而歸之體乾之君子。故結之曰。乾元亨利貞。明天人一體。非故一之欲二焉。而不可得也。項氏曰。在事之初。爲善。善之衆。

盛爲嘉衆得其宜爲義義所成立爲事此一理而四名也

潘雪松述曰四德皆善總只是生生之心元爲善之長非元无所資始无所根蒂

萬善皆嘉德也惟亨則嘉美於此而會如朱明之夏百物休暢

程敬承曰亨句不必添出禮字只就善之通處有許多嘉美齊集湊合於此故曰會此就性體无文上體認不可泛涉外面動容周旋等語

程敬承曰利者因物宜物而不過物即能諧物者也故

利乃義之和以見私利非義悖義非和也經釋曰惟義與利有介然之辨故即義之和明利焉 吳一源曰人知天地絪縕之氣太和而不知其所以爲絪縕者物各付物截然有定本嚴肅也人知天地嚴肅之氣爲義而不知其所以爲嚴肅者各因其分而遂其所宜本太和也是故人得天德之利以爲義義也者所以利天下所以和天下而非所以拂天下也

按貞者靜而正也王伯厚曰貞者元之本貞下起元是后來生生化化之根抵根抵在心貞固牢立可依以爲事之幹易述曰貞居隆冬木冬惟幹葉盡剥以歸根也

朱晦翁曰體仁不是將仁來爲我之體猶言自家一節身體元來都是仁也

程敬承曰天大德曰生此生脉即仁體也君子體仁渾身都是生機一體萬體一生萬生故足以長人

又曰嘉之會性體之本然也君子於嘉之會處毫無增減適符其本然性體此便是合禮禮不在嘉而在嘉之會君子得其所會則何所不嘉故曰嘉會足以合禮經繹曰禮者仁之體三千三百非實有體無於禮者之禮也合禮者合此者也 洪覺山曰利己則私則害義利物則公各正性命則和義和義所以爲義耳汝吉曰以

已制物戾也。裁物適已厲也得和義之意矣。按上言義之和加之會而此言和義加會者以人事而體天德也。

潘雪松述曰：君子之貞自其天性靜正不忒寧極而固，故足以幹事。王伯厚曰：周公曰：冬日之閉藏也不固，則春夏之長草木也不茂，可以發明貞固之說。夫貞所以成終而成始者也。

程敬承曰：上言貞者事之幹，此節加一固字何也？蓋凡事之幹依理以立，只要植得固耳。乾之貞本自固，君子貞固猶云固守此貞也。天下事千枝萬葉不離一貞貞。

固而根深矣故足以幹事謂事以有幹而成也

易述曰君子能行此四德者故曰乾元亨利貞道非人不載元君子之健何能行君子之行吳因之曰不是健了然後行四德行四德就是健洪覺山曰乾健也天行也知天行之行則君子之行其至矣 陸庸成曰分爲四德統爲一元故論乾之四德者必首元以統天則君子之行總是仁以行之可知矣苟又有箇健以行仁是元爲善長而更有一善爲長之長也觀傳中說元便說乾元其旨深乎

初九曰潛龍勿用何謂也子曰龍德而隱者也不易乎世

不成乎名、遯世无悶、不見是而无悶、樂則行之、憂則違之、確乎其不可拔、潛龍也。

潘雪松述曰：初爲龍德，起爲世用，宜也。位適居下，與時而潛，道可以易世，不求治世，无必用之心也。隱可以成名，不求成名，无潔身之志也。鄭玄曰：當隱之時，以從世俗，不自殊異，无所成名也。遯者，藏其身而迹不露也。至於遯世終其身，一无所施，而无悶晦其迹，并晦其心，雖不見是，其遯世而亦無悶。樂則行之，憂則違之。若行若違，初無容心。蓋根深寧極，自信者固曰：確乎其不可拔。汝吉曰：詎無樂行適也。憂則違之，歸於潛蟄，以存身言。

潛而憂違與樂行並稱表龍德也龍德天德而人者之
成心盡亡也確乎其不可拔即乾體剛健堅固之義

洪覺山曰龍德而隱无以甚異於人而致其知故不易
乎世亦不成乎名逃世不見是而無悶樂行憂違幾于
無聲臭矣聖賢之學只到此處爲難惟其有逃世无悶
之心故能樂行憂違同乎時而不與于物故不可拔不
可拔者其志也乾健之志也潛龍未出而以用舍言者
出處之始重之也唐疑菴曰一陽初萌在人爲性真
乍見正君子所以立天下之大本處深之愈深固而又
固研幾藏密以通極于命非特榮名利祿即一切垂世

立教一切濟世安民。可喜可願之事。皆無足以動乎其
中而拔之者。此其所以爲龍德。此其所以稱潛龍也。

蘇紫溪曰。凡人之學問。不深而潛者。自炫聰明。自任見
解。一切世味。一切好名之心。馳於胸中。得不勝喜。失不
勝悶。此身精神。全在外走作。隨時轉動。如何不可拔。不
易乎世者。胸中原無世味。不成乎名者。胸中原無名心。
無世味則忘進退矣。無名心則忘是非矣。可行則行而
亦可以違。可違則違而亦可以行。吾之胸中原無加損
也。此之謂不可拔。此之謂潛而隱也。游氏曰。不易乎
世者。用舍在我。故遯世無悶。不成乎名者。非譽不在物。

故不見是而無悶此最妙 貢受軒曰人在世間都被
世界轉移去不易乎世這是出風塵的漢子然纔是特
立便要成名既不易乎世又不成乎名纔潜得不凡所
以遯世無悶得此已是沒世界的心腸渾乎道心之微
矣 登之曰君子依乎中庸遯世不見知而不悔潜龍
也非中庸不稱龍非遯世不悔不稱潜

程敬承曰龍德而隱惟有龍德故能隱也以龍德而隱
故隱有關世道曰不易乎世不成乎名謂其無心於必
易必成則可謂其有心於逃世逃名則不可無悶之心
即可樂可憂之心其憂樂皆爲世道也確乎其不可拔

於兩則字內見得朱子曰此非專爲退遜不改其操也
憂樂行違時焉而已嘗觀龍之潛也時出時沒而神靈
不可測初之隱也亦時行時違而變化不可知故曰龍
德而隱 蔡虛齋曰初九何常有樂行時若其心則固
非必於憂違而不能樂行者也盧中菴曰憂字不必深
看正進齋所謂少有拂逆我心不快之意如孔子因問
陳而遂行孟子於崇見王而有去志也

九二曰見龍在田利見大人何謂也子曰龍德而正中者
也庸言之信庸行之謹閑邪存其誠善世而不伐德博而
化易曰見龍在田利見大人君德也

程敬承曰看來此節還歸重德字據本文曰龍德曰君德曰德博而化信謹存誠不伐皆語德也其曰正中不過以此別于潛龍耳時說重時誤矣又謂不伐以上爲龍德德博而下爲正中則益誤矣閑邪存誠非待有邪后閑也庸信庸謹奇袤已黜而入於誠顧誠有信之謹之而不能盡者必閑之益密存之益純乃可還乾始之元而歸性命之正動變而化所自來矣故閑者閑於元可閑而存者存於不待存此至誠无息境界所稱龍德而爲大人之利見也游讓溪曰庸信庸謹閑邪存誠大人之學誠諸身而已矣不伐而化誠身之積也 洪覺

山曰九二龍德正中言行信謹大段无甚着力惟只是閑邪則誠自存矣信謹者誠也閑邪主一也法乾之主一所以誠也君德大人之德也善世不伐德博而化大功大業不出乎庸言庸行之間則君子之學可知矣蘇紫溪曰論聖人之德則曰龍德論聖人之學則曰庸信庸謹此乾之所以爲易知也又曰遜世原未嘗損何悶之有善世原未嘗加何伐之有不伐字要說得細只是胸中無一毫自足之心若說誇張之類則淺矣蘇子瞻曰堯舜之所不能加桀紂之所不能亡是謂誠凡可以閑而去者無非邪也邪者盡去則其不可去者

自存矣是謂閑邪存其誠不然言行之信謹蓋未足以化也

九三曰君子終日乾乾夕惕若厲无咎何謂也子曰君子進德脩業忠信所以進德也脩辭立其誠所以居業也知至至之可與幾也知終終之可與存義也是故居上位而不驕在下位而不憂故乾乾因其時而惕雖危无咎矣

按曰乾夕惕豈是空空着慮任大責重處之最難惟是進德脩業可以免咎而德何以進忠信其所以也業何以脩脩詞立誠其所以也此只論其大要耳忠信工夫全在知至至之內用脩詞立誠工夫全在知終終之內

用至於可與幾而德進矣、可與存義而業居矣、曰至曰
几皆進字意、曰終曰存皆居字意、其終日乾乾夕猶惕
若之精神、全注於此、以故德業日盛而已、不有夫何驕
進修方勤而人不怠、夫何憂、總約之存誠之一念、立誠
之一事、而以處上下之間、無難矣、雖危何咎、
蘇紫溪曰、九三一爻、是古人學問大源頭、大學之誠意、中庸之
誠身、俱不出此、進德便是明德、脩業便是齊家、治國平
天下、古之聖賢、視天下國家、便當作吾身實事、舍此亦
無業之可見矣、德非外來、是吾心固有的業、非鑿空是
吾身合做的、世有一種虛假學問、外飾而中漓、陰非而

陽是豈惟无得且併其固有者而失之矣又有一種虛
談的人聽其言論聖賢無以遠過而全無一毫實事吾
儒掀天揭地事功豈可以空言取辨耶忠信是一片真
心全在天理上更無一毫夾雜亦無一念虛設卽心是
理有日長而無日消矣脩辭非在詞語上用功也不言
而躬行旣言而顧行念念皆實亦事事皆實任他治平
事業只是真心做出去而已知至知終是忠信立誠之
功必做到盡頭處所謂君子無所不用其極也至者天
理之至極大學所謂至善終者事理之歸宿孟子所謂
終條理知至至之必至之而後爲知至也以口耳爲知

者未至燕而言燕未至越而言越非真知也知終終之必終之而後爲知終也以見解爲知者知農而不終業知工而不終事非真知也與幾其知幾之神乎神天德也存義其精義之化乎化天道也

易述曰乾之爲德惟於惕字見之知至知終惕若之真體也

程敬承曰因時而惕時字當味位居下之上正當惕而檢點時也因時而惕故可及時而進經釋曰三日乾夕惕何謂也曰達天終事也達天之學始非潛不入中非庸莫依終非乾惕不行

朱子曰忠信只是實若无實如何會進與播谷相似須是實下種子方會日見發生是忠信所以進德也忠信即誠也誠存諸心只懸空在裏面若不真實去做恐怕沒動搖立不住下必從忠信心說出便從說出的做去做到那極真極實處這道理始有著落安泊恁地豎將起來而誠立矣程子曰道之浩浩何處下手惟立誠才有可居之處有可居之處則可脩業朱子曰脩業居業兩者只是一意業如屋宇未脩則脩之既脩則居之脩業便是要居他

程敬承曰誠者成也立誠便做得成做得成便是可據

之業不成不可爲居也以忠信奠其基址而無以浮華
搖之則業完而居安矣故曰所以居業 洪覺山曰業
亦德也而獨以修詞言者人之病大率在言也立誠則
行在中矣

姚承菴曰知至而必至之一點實心直貫到底此方是
个忠信知終而必終之一點實心直做到底此方是修
詞立其誠 德而曰進必造到極致之地而后可故知
至猶虛也在因其所至而實有以至之夫至極處即真
幾微眇處幾非親履其域者不可與也與幾正見其能
至耳業而曰居必止得歸宿之所而后可故知終猶虛

也。在因其所終而實有以終之。夫此止歸處即義理安頓處。義非畢了其事者不可與存也。存義正見其能終耳。

吳因之曰：可與幾絕，不是知幾。蓋知至之所在而至之，則吾心思意念已造到至極田地，而吾胸中之所得幾微玄妙，不可以形象測，不可以擬議窺。此是玄通境界，精義入神光景，德豈有不進乎？

或問終之何以存義。程敬承曰：語云所謂十分人須有十分事事，苟不十分終是未完備。終之是完備得十分事，便收拾得十分理，无纖毫遺落。故曰存義存有時出。

不窮終身取足之意。因業用居字。故義用存字。吳因之曰。不是至之終之外。另有可與幾。可與存。義德進業脩。亦不是。直待可與幾。可與存。義處纔見得。只至之終之便完了。忠信全在知之裏面用。然不是懸空。忠信便會至之。都有修辭立誠。脩詞立誠全在終之裏面用也。少不得靠忠信作主。故曰不可截然開看。潘雪松迷曰。至何所至。終何所終。知至難矣。知終尤難。天地無終。萬物無終。聖學焉得有終。此言知終。蓋自聖人一貫之的言也。通於一。萬事畢。知至亦知終矣。然知至至之才可竭也。知終終之才不可竭也。至於從心不踰矩而

聖學之成終愈不可窮必也明終始之大人乎有開必先之謂幾聖人不動念而動幾唯變所適之謂義聖人不存幾而存義可與幾則所存者神可與存義則所過者化乾象天乾六爻達天矣然無甚深希有之行惟約之庸言庸行忠信脩辭而曰至曰終皆不外也示人易知易從之旨躍如矣

九四曰或躍在淵无咎何謂也子曰上下无常非爲邪也進退无恒非離群也君子進德脩業欲及時也故无咎

按九四在下之上故有或躍之象在上卦之下故又爲在淵之象進則躍退則淵上下進退未有定擬故曰或

也或上或下何其跡之无常而非爲邪以干進也或進或退何其心之无恒而非離群以獨往也其平日之進脩德業原不爲一身全是爲天下此則欲及時而進耳經繹曰君子德業達天何動非幾何幾非時時其靡常徐起而赴之欲不先不后幾及之而已矣唐凝菴曰夫四在他卦已爲大臣此猶進退未定何也全乾皆君也乾之事業必待于五四猶未成其爲君也故有无常无恒之象 无常无恒須說得有分曉不果於上而又不安于下是爲上下无常不果於進而又不安于退是爲進退无恒 吳因之曰及字最有味時者是機會一日

也先不得一日也後不得先一日便屬躁厲後一日便屬固滯及者不先不後恰好正中機宜之意但此處重在後一邊纔是欲進欲上本旨 胡仲虎曰三四皆以進德脩業言者重剛不中皆危疑之時聖賢處此惟有進德脩業而已况二爻在上下進退之間乾道變化之際于進退而識其幾於變化而見其妙所謂窮理盡性以至於命也

九五曰飛龍在天利見大人何謂也子曰同聲相應同氣相求水流濕火就燥雲從龍風從虎聖人作而萬物覩本乎天者親上本乎地者親下則各從其類也

潘雪松曰此廣陳利見之義蓋大人之所以爲大人者已詳於九二閑邪存誠德博而化五之飛龍在天則至誠之變化也物無不從其類者聲氣無形相應相求以同孚也水火无情流濕就燥以性從也龍變化而雲從虎有威而風從神理之感通也皆出自然一毫人爲不與焉以發聖人作而萬物覩之意覩之者親之也本乎天者親上本乎地者親下天地之間故相感應各從其類若此矣各從者一物親一物而已至於聖作物覩無一物不親者何也聖人者三才之宗主萬物之天地所謂出乎其類者故統乎萬類萬物覩聖人即利見大人

朱子曰天下所患无君不患无臣有如是君必有如是臣雲從龍風從虎只怕不是真個龍虎若是真個龍虎必生風致雲也 唐凝菴曰謂之本則知其資始之本來固然聖人安能有加亦還其本來而已蓋至于各從其類則物之无不若其生遂其性而性命之各正矣乾元以是而資之聖人以是而保合之御天之事畢大人之利見以此 洪覺山曰夫子于九五止曰上治曰位乎天德聖人作而萬物覩而不見有爲之迹何也相應相求親上親下皞皞然以氣類感召各從所欲以治而功業文章无可名焉是龍德之盛治之至也

吳臨川曰鶴鳴而子和雄鳴而雌應一鷄鳴而衆鷄應同聲相應也日火之精而取火于日月水之精而取水于月磁石鉄之母而可以引針同氣相求也

上九曰亢龍有悔何謂也子曰貴而无位高而无民賢人在下位而无輔是以動而有悔也

張幼于曰此三无字乃上九自无之也盖既謂之貴自是有位者但志滿不能小心以慎有位故曰无位耳既謂之高自是有民但志滿不能巽志以體下民故曰无民耳既謂之賢人在下位則自是爲我輔者但志滿不能虛已以用賢雖有位若无輔耳皆亢意也 易述曰九五貴之位上九在五之上故貴而无位何安曰既不

處九五之位故无民也夫率土之濱莫非王臣既非王位則民不隸屬矣自四而下以陽居陽皆在下位之賢人聲應氣求雲龍風虎皆從九五與上无與故曰无輔其亢如此升極當降故有悔 應邦升曰九五當位宜動上九不當位不宜動夫吉凶悔吝生乎動上九宜靜而動故有悔若順時不動焉得有悔爻詞但曰有悔孔子申之曰動而有悔也蓋言上九非決有悔緣妄動則則悔耳聖人處此便无悔只是不動 登之曰龍有亢乎六位時乘亢亦龍之一位也位在則道在若慮亢之有悔而先處於不亢之地此智士之所爲耳豈曰龍德

易述又曰亢龍與時偕極聖人之不得已也何以悔曰
聖人居易俟命甚无樂乎處極重之勢也凡言亢者必
極重而難反是以悔悔亦聖人之情乎曰聖人未嘗遠
於人情也情有喜怒哀樂聖人必不擇樂而避哀事有
吉凶悔吝聖人必不趨吉而避悔

潛龍勿用下也見龍在田時舍也終日乾乾行事也或躍
在淵自試也飛龍在天上治也亢龍有悔窮之災也乾元
用九天下治也

按前云陽在下也以氣言此曰下也以人言 蘇紫溪
曰陽氣在下則歛而不散人心常下則晦而不炫孔子

所云慮以下人正是潛心工夫

龍旣見而在田豈爲時所棄以二方出潛尚非正位故本義曰未爲時用

行事謂進德脩業之事程敬承曰事而曰行即天行不息之意

此爻本是進意姑試其可是自試其可爲者耳非不爲也洪覺山曰自試自審也上下進退之宜存乎吾心非他人所能與故自試也

居上治下歸重居上者方切飛龍在天語意洪覺山曰龍德在上而天下化之以德而不以刑政故上治也

亢龍處位之窮窮極而災至矣傳曰窮則變變則通災之免也其惟聖人善處亢者乎舊說窮謂亢災謂有悔覺非何也悔自凶而趨吉者也程敬承曰聖人必不以悔爲災也

按元天之心也九天之用也聖人體天之心用天之道純是剛健不息故謂之乾元用九敬仲曰非乾元則豈能用九而不爲所用能用九則隨時而應各得其所初而潛在二而見在三而惕在四而躍在五而治在上而不亢故曰天下治也 蔡虛齋曰元包四德故舉乾元足以盡君道

程敬承曰元者天生物之心也仁德也乾以元君萬物故雷霆而濟以雨露則物生聖人以元君萬民故精明而濟以渾厚則天下治按一百九十二爻皆九而乾九獨言天下治者傳所謂用九之道聖人得其用則天下治也

楊止菴曰九五爻故言上治用九總六爻故言天下治天下上下下六爻之象也

潛龍勿用陽氣潛藏見龍在田天下文明終日乾乾與時偕行或躍在淵乾道乃革飛龍在天乃位乎天德亢龍有悔與時偕極乾元用九乃見天則

潘雪松曰前皆言人事此多言天道而合之人

陽氣潛藏看一氣字還在世運上說張幼子曰孔子什
潛曰隱曰下曰藏隨事制義无不可也

程敬承曰德施普矣天下被其化德博之化也文明是
雍熙太和景象紀聞曰文謂物之鮮榮明謂化之光顯
也 九三乾乾行事一隨其時時不息而進脩亦不息
也紀聞曰无時不謹者君子守貞之常而因時加謹者
君子處危之道也

傳曰龍之在淵革潛而爲躍九四上進革卑而爲尊乃
者疑而未定審其可革革之善者也

洪覺山曰離下而上故云革古人重革故或之所以處
革也張雨若曰六位皆道所在位革則道亦革 蘇紫
溪曰進德脩業乘時者也所不得變革者也上下進退
趨時者也所得變革者也

潘雪松述曰龍潛龍見龍躍皆非其本位惟在天乃還
其本位故曰乃位乎天德裂德與位爲二者位非天位
德非天德位以德居斯爲飛龍在天 蔡虛齋曰乃字
似亦有意言九五之位乃是位乎天德者非無德而據
尊位者也傳時旣極則處時者亦極矣李隆山曰時行
則偕行可也時極則偕極是爲不知變 紀聞曰初曰

周易卷之一
德之隱二曰德之中三四皆曰進德五曰位乎天德上
不言德者過中非德也

登之曰用九以九爲用也用即德性用事之用純陽之
卦用皆天則无一毫之陰滓也冠以乾元謂以統天之
德而用純陽也乾元之位一其數九一者元之體九者
元之用體與用合而成變化肖象於龍六爻之位則九
之所乘也見者如所謂于此可見之見非聖人見之也
謂之則者有限制而不踰意以龍之變化豈其膠於一
定不知至无定之中有一定不可易之天則在焉如當
潛而潛當見而見云云皆則也不膠於一定而不失一

定之則君子所以爲時中也。九亢而用變正是貞之極而歸于元元之所爲終始相因而无首也。故曰乾元用九可以見乾道變化之則。蘇子瞻謂天以无首爲則是也。

按此數條重天之氣運上立說。陽氣潛藏是天道晦冥閉塞之秋。天下文明是世運雍熙太和之候。終日乾乾者時當進修。故朝乾夕惕不敢懈也。或躍在淵者時當改革。故觀變相幾不敢輕也。飛龍在天者乘時撫運。乃天命之歸於有德。亢龍有悔者與時偕極。乃天命之厭乎滿盈。乃知天道未嘗過亢。君道不可過剛。故又曰乾

元用九乃見天之則止菴曰六爻之象皆時也六
爻之時天時也總之各當其則而已故曰乃見天則
乾元者始而亨者也利貞者性情也乾始能以美利利天
下不言所利大矣哉大哉乾乎剛健中正純粹精也六爻
發揮旁通情也時乘六龍以御天也雲行雨施天下平也
程敬承曰此章大意是申明乾元之大與首章大哉乾
元相應其曰大矣哉又曰大哉贊之不一而足總之一
大字槩之矣惟大故聖人用其道可以平天下試味首
章云首物咸寧謂泰平非元初生意之流通耶天道也
治道也統歸元始一脉者也彼以四德運于天具於易

體於聖分作三項謬矣。吳因之曰：上二節說得元統四德之意已了，故第三節承而贊之，只看開場獨說一箇元字，則三節大意見矣。

按乾具元亨利貞四德，而資始惟一，元乾元，乾始也，惟无始有始，斯亨，自阻遏不住，始而亨者也。觀一而字可見亨物者元亨之這一點生意，直貫到底，到那利貞時，物物各有個性情，此皆是元始之氣綿延不息，以至於此。故三節竟以乾始作主，一直說下而贊其大。程傳曰：乾始之道，能使庶類生成。天下蒙其美利，而不言所利者，蓋无所不利，非可指名也。如此則始亨性情包在美

利一句內了甚渾融 紀聞曰止言利不言所利其利大而不容指一事也若曰利建侯利女貞利涉大川云云皆言所利者纔言利便有利有不利矣 陳四明曰美利猶云好利利天下猶云宜天下之物也二利字即利貞之利得其宜也

當始亨時少不得也是乾之性情然却是性情發越處未見其真惟至利貞乃歸其本根還其命脉乃見其真性真情本義云性情之實實字最要着性情二字要分曉生意完足於此是性而後來生生不息之機已胚胎於此便是情情即是性中所含之情即各正保合二句

意 洪覺山曰性生理也情生意也生意始發于元而成性于貞言利貞者言乾德之性情如是非言乾之利也言利則有物而小矣故夫子不言若謂貞不有其功爲不言所利則利貞之文已言之矣

程敬承曰前言乾元乾始總是一箇乾大哉乾乎即承上文大矣哉說來言乾之大豈一名目形容得盡故着剛健中正等字

洪覺山曰胡云峯曰剛柔以質言健順以性言朱子曰剛以體言健兼用言剛健疑于不中不正故曰中正中正容有所未盡者故曰純粹精也純以言乎其全粹以

言乎全體中之微妙精者至也熟也渾合而無迹也情者義也六爻之所各得者也四德即六爻之德六爻即四德之用亢龍不言德何以爲純粹精也在一爻則謂之亢在全卦則謂之純雲行雨施聖人之德與天同矣。孫質菴曰剛健等字只是就他氣機運動而爲元亨利貞處細細想像許多妙處出來剛是就他體段說如春夏便生長秋冬便收藏一毫遏他不住何剛也健是兼他發用說如春而夏夏而秋秋而冬冬而復春年年運行不息何健也中是元亨利貞之運行適均而不偏勝如春夏秋冬各三箇月是也正是元亨利貞之立位分

明而不相混如春只管生物夏只管長物是也易述曰
純是純一不雜如元之時純是一段始物之氣用事亨
之時純是一段生物之氣用事至利貞莫不然更無一
毫陰柔之氣雜乎其間焉粹是粹美无惡如元本冲和
之氣始物矣至亨利貞皆極其冲和之美更無一毫邪
惡之氣雜乎其間焉精者元始亨通利遂貞成皆維天
之命至微至妙上天之載无聲无臭有不可以粗迹形
容者乾陽故剛健陽居二故正陽居五故中六爻純陽
故純粹精

程敬承曰語乾元之大而總歸一精字精故不容名言

惟聖人以乾卦六爻發揮之而全乾之精蘊旁通無餘
矣何者六爻即六龍也六龍一時也惟此六龍足以闡
乾之精惟時乘此六龍足以御天之道時之變化即精
之妙用妙用惟我萬化歸元即如天之雲行雨施而天
下平矣不必拘拘以元亨利貞分屬自始至終只是起
初一點德意流注默令人遂生若性而元氣太和盎然
於宇宙間豈不是蕩平景象又曰情是乾之情微言
之則精顯言之則情也情而曰旁通六爻足以貫萬變
矣一卦足以周萬用矣乘龍御天即此發揮旁通者通
之乎天下也以乾之情通之乎天下之情則天下平矣

夫何以云雲行雨施也行之施之時之乘也六龍之妙用四德之幹旋也此便是生意之流通此便是美利之各足利貞性情不即在始亨範圍中耶故乘龍御天而天下平惟體元者能之此章提起乾元作主即就乾始而贊其大大故足以盡天道也亦足以盡君道御天即統天者之爲也信乎乾元之爲大也

吳一源曰易之道盡乎乾乾之道盡于元元也者統六龍之道而貫乎亨利貞者也孔子雖分爲四德而元爲善之長則亨利貞皆其支派也元以長人則台禮和義幹事皆長人之一德也是故元統天者也萬物資始此元也品物流形此元也終始一元之終始也變化一元之變化也達于元而易无餘蘊矣苟泥于乃利貞之言而不察其首尾互相發明之意遂以流形爲亨各正性命爲利貞以乘六龍爲聖人之元亨則雲行雨施非變

化取物既流形非正性命取乾元但能始物而亨利貞
非元取六龍无利貞之德取物資始于元則性命太和
正其中矣流形則各正保合在其中矣元統天則亨利
貞在其中矣乘六龍則四德在其中矣夫四德六龍非
二道也四德即六龍之德六龍即四德之象自四德言
之則四德中各有六龍自六龍言之則六龍中各有四
德此元之賦于天爲命此元之受于物爲性此元之渾
融不相悖害爲太和各正者萬物各具一元也保合者
萬物統會一元也故利貞即元之性情而以美利利
天下一乾始之大也聖人作易其示人體元之功乎
君子以成德爲行日可見之行也潛之爲言也隱而未見
行而朱成是以君子弗用也

朱子曰德者得之於心行出來方見行而未成只是事
業未就敬仲曰二謹信三進脩四及時易爻至五爲
成德之地初在下故言未成程子謂未成者未著也時

當潛而所行未著以舜之側微當之得之矣

君子學以聚之問以辨之寬以居之仁以行之易曰見龍在田利見大人君德也

程敬承曰此言君德與龍德正中節何所分別蓋前節曰信曰謹曰誠在心體上言其所謂誠卽仁也然聖人雖是性天德亦豈能廢學問不事故此又從學聚問辨說到寬居仁行裏面來此精一宗旨博約全功也始之學問皆爲求仁設至仁行而其心純焉卽誠也是學之成也仁是心無私欲行只是此理流行無間仁行卽天行也楊廷秀曰仁行謂心之全德生生不窮與天同運

無一息間斷

潘雪松述曰君德卽九二乾體學問寬仁以進德也夫德患其不聚爲已有耳不學則不聚學者著察於庸言庸行之間曰覺與我湊泊也所謂聚也學必問者防臆見也問以盡人人合而聽之則天故曰問以辨之夫不大其心不能體天下之物惟寬則容容乃公惟寬則虛虛乃受是居德之地也然必無私之盡庸信庸謹渾然本體爲一而後德斯成也故曰仁以行之歸於體仁長人之德焉此之謂君德而文明之見德施之博在其中矣○洪覺山曰學者覺也泉翁所謂心覺則聚不覺則

散是也寬居廣大之體也仁行不息之用也仁行者仁之行也元始而亨之義大人之學也 朱子曰學聚問辨既探討得當且放頓寬大田地待觸類自然有會合處故曰寬以居之 王伯厚曰寬以居之朱子謂心廣而道積程子易小畜傳曰止則聚矣呂成公謂心散則道不積充拓收斂當兩進其功 周用齋曰學聚問辨寬居仁行有自強不息之意乾道也敬以直內義以方外有收斂慎密之意坤道也

九三重剛而不中上不在天下不在田故乾乾因其時而惕雖危无咎矣 九四重剛而不中上不在天下不在田

中不在人故或之或之者疑之也故无咎

胡雲峰曰下乾以二爲中三則重剛而過乎中上乾以五爲中四則重剛而不及乎中過則憂不及則疑然憂所當憂卒於无憂疑所當疑卒於无疑此二爻所以皆无咎 按乾卦以乾重乾三四在重卦之間故曰重剛敬仲曰他人之重剛不中必有凶此則雖危疑而无咎者乾乃聖人之德重剛則剛健之至德也特就所居之位見爲不中耳

九三曰上不在天下不在田此正言其居上之下下之上當事任而爲心也先言重剛者其惕厲自重剛中

來也能惕厲故可以勝上下之任而无咎九四上不在
天下不在田與三同而曰中不在人盖三爲人位猶在
下體四則離下而上矣時方在道不可退步進亦不可
輕也時亦不可失也 唐凝菴曰四介於上下進退之
間所以爲疑因不敢以有常有恒之見自決於上下進
退之間所以疑之也

夫大人者與天地合其德與日月合其明與四時合其序
與鬼神合其吉凶先天而天弗違後天而奉天時天且弗
違而况於人乎况於鬼神乎

潘雪松述曰大人德合天地合乾坤之元德也明合日

月序合四時吉凶合鬼神乾道之變化也皆大人上治之功如此存之爲天德故曰先天動之爲天道故曰後天總在上四句都包有了下面抽出重在弗違上去耳非合德之外又有先天後天之功也天不違天之從之也奉天時天與之應也唐凝菴曰我得其所以統天都則天故不出我之範圍何先後之有間也 或問聖人與天爲一安有先後之殊朱子曰只是聖人意要如此天便順從先後相應不差毫釐也吳因之曰先天二句總是一作文言只要狀他橫行直撞與天爲一故分個先後形容之如堯舜之禪受湯武之放伐分四時別五

常制禮作樂網罟舟車天地一切開先創造者總是天地間未有之事然畢定是天地間原有之理以其創乎前之所未有則曰先天以其本乎理之所原有則曰後天其實一也天弗違者道理不能違大人奉天時者大人不能違道理一是默契一是奉行見大人渾身是天登之曰有開必先先天之學也妙用皆在後天奉時中程子云聖人不先天以開人各因時而立政大人心通天地之先而用必後天事起天地之後而智必先天先天者後天之體後天者先天之用也先天後天二之則不是惟見天則者能一之天下有道庶人不議天下有

道其鬼不神大人握先天之柄故莫之能違也。楊止菴曰舊以先天爲意之所爲然纔有意便是後天邵子之言精矣其旨以思慮未起朕兆莫窺之際曰先天以幾微旣動形迹旣着之際曰後天。洪覺山曰善必先知之不善必先知之知幾如神知其在我合其吉凶之謂也。

亢之爲言也知進而不知退知存而不知亡知得而不知喪其唯聖人乎知進退存亡而不失其正者其唯聖人乎張勿子曰潛之爲言言君子者再必君子而後能安于潛也亢之爲言言聖人者再必聖人而後不制于亢也。

吳因之曰進退存亡得喪相因此必然之理所易明彼以亢致悔徃徃有絕人才智何故獨不明此只爲他欲進欲存欲得之心勝了故只見這一邊更不見那一邊縱必敗之形已兆徑當面挫過不見若此等人僅可旁觀不可當局聖人胸中无物原不曾留戀進存得之心故這一邊障蔽他不得原不曾有窺避退凶失之心故那邊如燭照數計語云身在薩中不見薩此語最有味知進退存亡不是在進退存亡上看出來不失其正不是在進退存亡上處得來聖人自是大綱罟成天地間只有一箇消息盈虛道理天地之闔闢日月四時之禪

代陵谷之變遷鬼神之屈伸人物之代謝世事之進退存亡總是此理聖人一身渾是造化自作止語默之間以至出處行藏之際那一件不是陰陽消息盈虛之理流行變化於其身而善處進退存亡者自在中耳此事從天下看聖人處得妙遂以爲神化莫測在聖人直如飢渴飲食家常茶飯不足異也因之又曰知進退存亡而不失其正只是一時字進退存亡便不是聖人亦不能知之者只爲把利害兩字做了主張憑他會筭計只是利害以內之意念亦有會處置的也只是利害以內處法夫胸中着了利害兩字先已爲利害所掩越筭得

明白越成障蔽越處得曲折越增溪壑聖人毫不落常情利害只在天理上起念天理未有終亢者所以能燭照數計隨時貞轉而善處於進退存亡之際也 胡雲峯曰貞者正也乾元之用所歸宿也乾之四德始於元至此又論聖人之體乾而歸於正蓋四德以貞爲智上九而能貞則必不至於窮此夫子所致意也 蘇紫溪曰衆人之制進退存亡也以人聖人之制進退存亡也以天天有盈虛而況於人乎知進知退聖人之胸中原無進退也知存知亡聖人之胸中原無存亡也靈覺所照何所不知中本自得何所於失故曰不失其正歸於

不失天道之正而已乾始於元終於貞二曰仁以行之
乾道之始也上曰不失其正乾道之終也至謂乾元用
九則貞元之妙如環無端矣 楊止菴曰蒙引曰六爻
皆以聖人明之亢亦聖人乎曰唯聖人是也善至人亦
有亢時特以時雖亢而知之善處乎亢所謂知進退存
亡而不失其正也乃所謂乘龍之亢也

坤

三三三 坤下
三三三 坤上

坤減乾之半此他本來資稟才力分量之不同雖均是
聖人却有天道人道之別坤之資稟雖稍不如乾然想
牝馬之貞意思他量已量人錙銖不爽一切好勝客氣

終始一毫不起如這事未槩到我做憑他滿眼風波按
定不動若論自家分量上便會趨時如赴也決不挫過
了機會除了純陽至健旋乾轉坤手段就是他丁天地
間也只有這兩樣異人

坤元亨利牝馬之貞君子有攸往先迷後得主利西南得
朋東北喪朋安貞吉

坤爲純陰陰之純則順之至順之至者順乎陽也所以
乾元亨坤亦元亨蔡虛齋曰乾元亨無所不元亨也坤
元亨只是柔順者元亨也此陽全陰半之理又曰先後
不可以一事之首末言只是言任已先物則致迷居後

從陽則不失也

牝馬之貞順中有健也紀聞曰物之牝者皆能從陽求其從一不變莫牝馬若也故稱牝馬之貞章氏曰陰畫中虛受乾取象牝馬配牡有資生不窮之義焉唐疑菴曰乾爲馬坤爲牛稱牝馬者從乾而稱之也從乾而稱之以見坤之不自爲主也蘇子瞻曰龍變化而自用者也馬馴服而用於人者也爲人用而又牝馬順之至也順之至即健也胡雲峯曰乾言利貞貞則無所不利矣坤言利牝馬之貞如牝馬之貞則利非牝馬之貞不利也下文曰後得曰得朋利也牝馬之貞故也曰先

迷曰喪朋不利也、非牝馬之貞故也、坤但得乾之半故
乾無不利而坤有利有不利與下文主利之利不同主
利利順也、謂先乾而行則失而迷、后乎乾則得而主於
順也、君子有攸往、以下是開示其例以明牝馬之貞意
陽先陰後、陽倡陰和、理之常也、朱子曰陰不比陽、陰
只理會得一半、不似陽兼得陰、故無所不利、陰半用故
就前後言、沒了前一截、就四方言、沒了東北一截、余
四明曰西南東北不必拘、但是陰之才力行不去的處
便是東北行得去處便是西南、安貞安於牝馬之貞
也、此句總上文而言、吳因之曰陰體柔躁只爲他柔所

以躁躁是那欲動而不得動之意剛則便動矣柔躁不能自守所以說安貞

陸庸成曰元亨利貞雖乾坤有同德然乾重元以元爲統坤重貞以貞爲安故乾之文言由元者善之長說起坤之文言由至柔至靜貞字說起何也乾知大始坤作成物也然乾元始物而無其始故用九曰无首坤貞成物而有其終故用六曰永貞坤之元皆是乾之元故曰順承天曰承天而時行然坤之貞亦非坤自爲貞故曰以大終曰无成而代有終坤非乾敵明矣 陸庸成又曰後蹇解二卦俱利西南者蹇則陽入坤體而居五解

則陽入坤體而居四也。又蹇獨云不利東北者，艮在下也。又解蹇二卦獨五曰朋來，四曰朋至，亦得朋之義。程敬承曰：吾合觀乾坤而知天下事不可先物也。天德戒於爲首，謂宜柔順者得之，而先則迷，後則得。坤詞復然，可見先之一字舉世所忌，不獨陽剛已也。

彖曰：至哉坤元，萬物資生，乃順承天。坤厚載物，德合无疆。含弘光大，品物咸亨。牝馬地類，行地无疆。柔順利貞，君子攸行。先迷失道，後順得常。西南得朋，乃與類行。東北喪朋，乃終有慶。安貞之吉，應地无疆。

程敬承曰：坤元之至，全在乃順承天一句。下面德合无

彊即從順處合也。德惟順故厚。厚故能載。守此順德而
不變曰貞。攸行行此順也。先迷失此順也。惟後則順。惟
往西南而不往東北則順。順者一於從陽之謂。君子惟
順故能安貞而應地。坤惟順故能厚載而配天。此一章
之大槩也。洪覺山曰。夫坤以順承天。何以爲至哉。元
也。健順一理。資始資生一幾也。无彊廣不息也。坤德合
天之大而自无彊。所謂至也。游廣平曰。其靜也。翕故曰
含弘其動也。闢故曰光大。含弘坤體也。光大乾事也。馬
乾象也。坤言牝馬言其與乾同類。故能行地无彊。无彊
光大咸亨矣。而乃曰柔順利貞。皆所謂順承天也。乾曰

大明坤曰攸行行即行地之行行所知也坤不先于乾
行不先于知故曰迷非真迷也乾知之事非坤道之常
耳坤始于西南而盡于東北乾始于東北而盡于西南
順坤而往故曰得朋乃與類行不先于陽故曰喪朋乃
終有慶安貞安于貞也君子應地之道如此分而言之
安者順之爲貞貞者健之守合而言之則以順乎健爲正
胡雙湖曰彖辭文王所作西南得朋東北喪朋后天卦
位至哉文王之作易也其當西北之時美里之囚乎味
安貞吉之辭文王之心盡于此矣

程敬承曰乾元統天本無疆也坤之德何以能與之相

合爲用。蓋乾坤共一元。乾之所始。坤即承之以生。實與
乾同運並行。以成化育而無界限。故曰德合无疆。而何
以言厚也。彼其資生時。所承天以付於物者。無減乾元
之初。其渾淪磅礴至厚也。下面含弘光大四字。正形容
厚德之妙。坤虛而受其含弘。坤美而章其光大。而資生
之品物。於是乎咸亨。亨者通者。通於外。未有不充諸內
者也。故含弘先焉。咸亨咸字。亦自大字來。含萬物而化
光。則萬物皆在其吐納之中。不謂之厚德而何。

唐疑菴曰。先言順而后言厚。非有二也。厚即順所積也。
故自各爻之陰有順象。六爻皆陰有厚象。楊止菴曰。

既云順承天又云坤厚載物德合无疆所以明坤之配乾相須爲用所謂天地合體者也

朱子曰資乾以始便資坤以生不爭得霎時間萬物資乾以始而有氣資坤以生而有形氣至而生即坤元也蔡虛齋曰造化原無兩箇元也坤元只是乾元後一截當其氣形交接處流形與資生大不同流者是發生源源不竭之意一箇亨嘉之會都是流形時事也資生特其肇端一處陸庸成曰天地生物正一氣流行方施爲乾施及于物即屬坤非乾既資始了坤方去資生也始之之氣機在乾而行於坤故并資生亦即承其始氣而

發育萬物此造化合一之功用也。陸庸成曰坤以藏之。不獨利貞時其靜也。翕爲易見也。即元亨時亦主於藏。故元猶醞釀之也。至咸亨處盡發越矣。而正見其厚。必曰含弘。必曰含萬物。蓋其厚德之所藏。非發越所能盡也。若乾則主施爲君。但曰雲行雨施而已。

林次崖曰牝馬地類順也。行地无疆順而健也。故承之曰柔順利貞。言此即坤德之順健云耳。不敢自主。承天之施以生萬物。柔順也。承天生物直至於有終利貞也。此節尊重柔順利貞一句。牝馬地類乃借彼明此之詞。君子攸行。只安常守分盡吾才力之所能爲而堅貞安。

固終不出於柔順之外其所行一如坤之順德也

經繹曰先迷失道道自不迷迷自失道後順得常道自有常順斯得常故知常曰明 唐凝菴曰乾統天故體乾之君子可先可後坤本承天故體坤之君子但可後不可先也又曰天言御若天不能爲主而君子爲之主本于乾之統天也地言應若地自爲地而君子自法之而爲君子本于坤之承天也君子攸行以下只發明君子順柔從陽之義始應得坤道利牝馬之貞 質卿曰先迷後得先之迷失柔順貞利之道也後之得得柔順利貞之道也非君子豈能審於先後之分耶曰東南

得明西北喪朋一得一喪皆柔順利貞之則也故乃終有慶非君子豈能審於得喪之間耶凡此皆安於牝馬之貞而吉所以應地无疆也地以其順而合天之无疆君子以其順而應地之无疆歸於天道之无疆而已矣朱子曰東北非陰之位陰柔至此既喪其朋自立脚不得必須歸本位故終有慶也言終有慶則慶不在今矣陸庸成曰后天卦位起震而終於艮故曰乃終終則必反也項氏曰得喪二字孔子恐後學誤認其意將有以得爲吉以喪爲凶故釋之曰東北喪朋乃終有慶所以發文王言外之義也

地之交乎天臣之位於君婦之歸乎夫皆喪朋之慶也程子曰

西南陰方東北陽方陰必從陽當喪其類全汝曰曰喪朋猶太之朋亡舍其朋而從陽故吉此說與朱義不合然却有理故並存之

象曰地勢坤君子以厚德載物

天以氣言故曰行此以形言故曰勢

程敬承曰地之厚德惟含弘君子之厚德亦惟含弘生意滿腔靡不翕聚靡不包納其載物无疆與地何異

陸庸成曰地勢非厚德乃厚德之形也東西南北无喪无得混一之規模也博厚配地君子之心極乎 諸理齋曰騶虞虎兕並育芝蘭荆棘並生封山濬川者不以爲德崑山堙谷者不以爲怨地之厚德也不屑屑於賢

愚貴賤之間不鰓鰓於取舍異同之辨即罰之刑之以至於命師征伐皆所以誨之君子之厚德也

初六履霜堅冰至象曰履霜堅冰陰始凝也馴致其道至堅冰也

潘雪松曰坤本資生而霜則肅殺之徵坤始何以象履霜陰主殺也陰氣始結爲霜盛則水凍爲冰故其象履霜即知堅冰之至其端甚微其勢必盛其初不可不慎也聖人謹初每類此履即初象履霜象初六堅冰象上六履霜者防龍戰之漸龍戰者成堅冰之禍

張雨若曰象只提履霜堅冰一句下三句皆是釋他意

思重始字戒於初也其道與上六同以理勢言馴有狎
順意古今只爲一馴字壞了許大宇宙爻曰堅氷至慮
其終也傳曰至堅氷防其始也胡雲峯曰至危之之辭
上六曰其道窮也由初六順習其道以至於窮耳王
伯淳曰乾初九復也而潛龍勿用即閉關之義坤初六
姤也而履霜堅氷至即女壯之戒又曰履霜戒於未然
月幾望戒於將然至於幾則危矣

方獻夫曰此爻不持在此卦爲陰長之初在六十四卦
亦爲陰長之初故聖人致謹焉蘇子瞻曰始於微而終
於著者陰陽均也而獨於此戒之者陰之爲物弱而易

入故易以陷人鄭子產曰水弱民狎而玩之故多死
六二直方大不習无不利象曰六二之動直以方也不習
无不利地道光也

唐凝菴曰乾性直坤亦未嘗不直正則自然直也乾體
圓坤則效之以方中則自然方也德合无疆則與乾並
其大矣敬仲曰坤之至與乾之大非有異不習无不利
與乾之利天下不言所利同也此坤體合乾之妙洪覺
山曰是三者者乾之禮故不待作爲自无不利但乾之
大則大而无方耳 蘇子瞻曰夫有所習而利則利止
於所習者矣故曰不習无不利 蘇紫溪曰不習非不

假於學也曰敬曰義皆學中事即聖帝明王亦何嘗廢學然緝熙敬止非矜持也由義而行非行義也思而无思爲而无爲是之謂聖學王註動而直方任其自然之性也所謂靜則體而動則用者也人心嘗失之於動惟動而直以方此六二爲坤道之純歟一說二之德靜而能動順而能健此所以爲直方也如一於靜則頽然耳退然耳其何直方之有

程敬承曰六二得坤道之純故直指其道爲地道無不利利字即孟子以利爲本利字意謂自然而直自然而然方无矯揉也習則有利有不利不習便无不利夫无不

利者坤之所以合乾而君子之所以應地也地道光大六二純乎坤道則大而光矣光者思爲不擾性體獨呈之謂

六三含章可貞或從王事无成有終象曰含章可貞以時發也或從王事知光大也

潘雪松述曰三有陽德爲章以陰居之有收斂之意故爲含章是其可貞之道也以其位陽而居下卦之上故云或從王事三五同功而非正應稱或陰體臣分故從而不敢居其成功以居下卦之終故代終也徐氏曰從者不敢造始之意成謂專成无成謂以陰承陽可

有所專成也有終陰之事也陽不足於後代其終者陰也註云有事則從不敢爲首故曰或從王事也不爲事主順命而終故曰无成有終也按无成有終爻象俱重无成上有終特帶言之耳曰有終正見其不爲始也是即安於後得主利之貞者歟蘇紫溪曰人臣非無才智之患而才智太過之患夫才智太過者上未免於偏主下或至于凌人渾厚樸實之意已斲喪而無餘天下國家之事未免漫爲而嘗試如之何其可以爲貞乎惟有其章而含之無智名無勇功恂恂乎其不能言斷斷乎其無他技臣道之正也無成有終畢竟是含章君倡

而臣和君先而臣後。臣之章皆君之章也。臣何功之有焉。胡雲峰曰：陽主進，陰主退。乾九三陽居陽，故曰乾其德主乎進也。坤六四陰居陰，故曰括囊其位主乎退也。乾九四陽居陰，坤九三陰居陽，故皆曰或進退未定之際也。時其退也。曰在淵，曰含章，唯進則皆曰或聖人不欲人之急於進也如此。

游讓溪曰：以時發者，言內含章美，非欲囊括自晦，但待時而動，不敢爲先耳。夫人臣而爭功能者，暗於道者也。此無成有終之爲光大也。光謂見得明，大謂見得大。呂東萊曰：大凡人出來做事，多被人疑忌，只爲預先多

露圭角不能含章惟含章然後以時發

程敬承曰彖言含弘故光大象言光大故含章互相發
明總之重含意也 吳因之曰尋常人欲含晦者多只
去鋤去驕矜深匿名迹然愈鋤愈生愈匿愈露者蓋不
曾去根本上理會自己未光大節中淺狹纔有一功一
善便无安着處雖強欲遏抑終止不住 項氏曰靜者
六也動者三也先含章而後從事故不爲始而爲終雖
含章而有終時故可貞而非必貞也可謂亦可如此非
決辭也故孔子贊之曰以時發也言可貞則貞可發則
發恐人誤以可貞爲當貞也爻辭於可貞之下用或字

接之便見以時發也之意含章猶秋冬之時從王事猶
春夏之時人但見陽居大夏而成歲而不知藏畜使有
今日者皆地之智含之則爲知發之則爲光大也

六四括囊无咎无譽象曰括囊无咎慎不害也

潘雪松述曰六四何以象括囊二中正有直方之德三
位陽有含章之美四重坤之交履非其中以陰居陰純
陰无陽當自括結其囊以求无咎无譽陰虛體有囊象
重陰結閉有括囊象四之括囊時勢所宜非過慎也孔
疏閉其知而不用故曰括囊功不顯物故曰无譽不與
物忤故曰无咎理齋曰慎不害者言其无失也不言其

有得也得則譽矣程敬承曰无譽非是惜之之意君子處亂世不可有咎亦不可有譽漢之黨人標榜於桓靈之朝以譽而殺其軀也抑不獨亂世然也乾初亦曰不成乎名名者人之所競亦人之所忌固爭之府禍之門也大都君子不樂居其名陸庸成曰陽宜在上故乾以初爲無用之地陰宜在下故坤以四爲無用之地括囊非專在言語上以默爲主一以經綸俱韜藏不露也是主靜之至也凡動便有利害故咎譽半焉逃乎咎者譽之媒遠于譽者咎之招此則出於利害之途其咎其譽兩无所涉括之時義大矣哉乾之潛坤之括不可思

議者與其乾坤之妙用所居無事而根抵是者與蘇
子瞻曰夫處上下之交者皆非安地也乾安於上以未
至於上爲危故九三有夕惕之憂坤安於下以始至於
上爲難故六四有括囊之慎陰之進而至於三猶可貞
也至於四則殆矣故自括結以求无咎无譽夫咎所以
致罪而譽所以致疑也甚矣无譽之難也胡雲峯曰
三含章四括囊皆取含蓄不露之象三以陰居陽猶或
可出而從王事四以陰居陰惟可括囊不出而已經釋
曰乾三四曰惕曰躍慎其動坤三四曰含曰括慎其靜
以皆人位各因其體性致慎於防危兢兢焉唐凝菴曰

於下卦之初已有堅求之慮况復交一坤則陰勢愈盛故不得不懼也

六五黃裳元吉象曰黃裳元吉文在中也

楊止菴曰黃中色裳下服黃裳者言其居中得下體也守中而居下則元吉傳曰坤雖臣道五實君位故爲之戒云

潘雪松述曰天玄而地黃上衣而下裳黃者坤土中央之色裳則法坤爲制而有五采之施者蓋中德在中而發於事業之象也五以陰麗陽而居中位德至此而盛美至此而顯故有黃裳之象此坤德之至元吉之道也

蘇紫溪曰天玄地黃曰黃以別於天也上衣下裳曰裳不敢安於上也以黃爲裳猶言以中爲順總是居中處下之意耳又曰文在中即美在其中之意言中固所以爲順也三五皆陰麗於陽故稱美焉然三曰含章五曰文在中此之謂闇然之章不顯之文甚矣聖人之不貴文也

唐凝菴曰易凡稱元吉皆原始得吉言貞吉皆要終得吉吉雖在五亦由此馬初六一履從始知辨故原始得吉耳不然至五漸堅矣安得有黃裳之美哉蘇氏曰夫文生於相錯若陰陽之專一豈有文哉六五以陰而

有陽德故曰文在中也王肅曰坤爲文五在中故曰文在中

上六龍戰于野其血玄黃象曰龍戰于野其道窮也

陰德之極陽所不堪曰龍戰非陰與陽戰乃陽不肯讓陰而與之戰也野戰言非常度也陰勢泛溢無復限制也又上有郊野象故云于野畢竟陽爲主陰爲客當龍戰時寧獨勝在陰陰與陽俱傷而玄黃莫辨矣故曰其血玄黃潘雪松述曰上六道窮即初六馴致之道其積陰非一日也是故君子謹履霜堅水之漸卦終陰極陽生陰陽交必戰其戰在龍則坤終而乾又始矣朱穆

所謂陽道將盛而陰道負也。馮厚齋曰：主龍而言則知陰不可亢，亢則陽必伐之，戒陰也；以戰而言則知陰不可長，長則與陽敵矣，戒陽也。胡雲峯曰：坤陰卦也，臣道也。六三曰「王」，示有君也；上六曰「龍」，示有陽也。不言陰與陽戰而曰「龍戰」，與春秋王師敗績于茅戎、天王狩于河陽同一書法也。其血玄黃而敗俱傷，陰雖極盛豈能獨傷陽哉？故曰「堅冰」者，防龍戰之禍於其始曰「龍戰」者，著堅冰之戒於其終也。

程敬承曰：亢龍曰「窮」，龍戰亦曰「窮」，窮則必變，故乾用九，坤用六，取其變也。變者窮之通也。

用六利永貞象曰用六永貞以大終也

胡雲峯曰坤安貞變而爲乾則爲永貞安者順而不動永者健而不息乾變坤剛而能柔坤變乾雖柔必強善變化氣質者當如之陽先於陰而陽之極不爲首陰小於陽而陰之極以大終善撫馭世變者當如之 潘雪松述曰坤之用六猶乾之用九也乾主成而坤惟順以健行曰惟安貞貞不可息利永貞而已矣坤代有終所以象曰以大終也陰能順乎乾剛則以陽終斯永貞无不利矣此用六之道也

程沙隨曰乾以元爲本所以資始坤以貞爲本所以大

終乾主元終始故曰用九又曰不可爲首重元也坤用六永貞又曰大終重貞也貞下起元元即大矣此大終所爲發也

程敬承曰坤代終者也乾以大始而此以大終不失爲順承之義矣又曰陽之極不爲首是无首也陰之極以大終是无終也此見天下未嘗一日无陽陰極之終復爲陽之始終始循環變化无端造化之妙用固如此○總論蘇紫溪曰傳曰乾健也坤順也夫健非過於有爲之謂也爲其所當爲也順非一無所爲之謂也爲而無所作爲也健而不拂則健亦順也順而不弛則順亦健

也至若時有後先事有終始若使之然而不得不然者則造化之所不能違而亦人之所不能違者也彼委靡之士趨而趨諾而諾者固無足數間有自恃聰明自矜才辨有所得焉而故衒之有所成焉而故張之即譽言日至而咎且隨其後矣況其不善之漸尤有可畏者耶古君子之事君也如地之承天也載物在君而已無名事業在君而已無功寧含其章而不敢專天下之成寧括其囊而不敢微天下之譽時而處後時而亡朋固順也時而正直時而執方亦順也矜伐可克而違不忘解几几可挹而誼不忘規茲其爲坤道之純乎然其要則

敬義先之矣。君子之主敬也。如臨上帝。如對明神。順其軌也。君子之集義也。不弛焉而忘。不躡焉而助也。順其序也。未萌而防。不以履霜而忽。先幾連根而拔。不以疑陽而忘血戰。順其宜也。至於貞焉而永大焉而終。則順亦健矣。坤亦乾矣。引之於前而莫知其首。推之於後而莫睹其終。茲其三極之至妙者乎。

文言曰。坤至柔而動也剛。至靜而德方。後得主而有常。含萬物而化光。坤道其順乎。承天而時行。

胡雲峯曰。乾文言釋元亨利貞。自元而亨。亨而利。利而貞。乾以君之所主在元也。坤文言則首釋牝馬之貞。自

貞而利利而亨亨而元坤以藏之所主在貞也

程敬承曰此章本義雖分釋貞利亨元其實不必拘泥
看來大意只是贊坤道之順以承天耳至柔至靜其本
體也承乾而動氣至即發剛只是柔之剛剛乃見柔之
至承乾之施隨物各賦方只是靜之方方乃見靜之至
惟至柔至靜也則后而不先爲道之常翕而能含爲化
之光要以乾先而坤特代之終其后得也順也乾施而
坤因作之成其化光也亦順也然則坤道其順乎其
承天而時行者乎於時行見其剛方於承天以行見其
至柔而剛至靜而方蓋先天有爲非順後天不爲亦非

順无爲而無不爲此之謂順此之謂坤道矣經繹曰柔靜順也動剛德方則順之健用成其柔靜順之至也故坤道其順乎承天時行而已矣

蘇子瞻曰夫物非剛者能剛惟柔者能剛耳蓄而不發及其極也發之必決夫物即如動故至靜所以爲方也蔡虛齋曰動剛德方固是健然終是順之健也盖至柔即不動也其動也承乾而動耳至靜若无形也德方亦只是承乾之施而賦形有定耳皆非自爲健也後得主利是彖詞有常是釋詞程竹山曰坤何以後得主利耶知始者乾也故坤不得而先施斷制者陽也故

陰不得而專主居後有終得陰道之常矣故有所得而
主利也經繹曰彖先迷後得主利語本自相足彖傳著
先迷不著主利不正言後得獨以後得得常一語括之
蓋以順表利以後順表後得也至文言又不著先迷不
正言後得主利獨言後得主明居後主利則主得其主
而主利爲得主得主爲後得之義躍然伊繼山曰化
謂化機指在坤者言也含非歛藏之謂只是元之後亨
之前光景耳若說是靜翁則是涉利貞時了而以亨接
利貞把元放在何處

積善之家必有餘慶積不善之家必有餘殃臣弑其君子

月易
卷之二
弑其父非一朝一夕之故其所由來者漸矣由辯之不早
辯也易曰履霜堅冰至蓋言順也

潘雪松紀聞曰文言什履霜因言積不善以積善配什
括囊因言賢人隱以草木蕃配配則相形而其理自別
此文言所以爲文之格也積善餘慶之慶即乃終有慶
之慶子安於正以從父臣安於正以從君不安於正不
能有慶李光祖云不早辨他直到得郎當了却方辨刻
地激出事來呂氏曰胸中有容着善處善自然積胸中
无容着惡處惡自然不積要哉言乎周用齋曰漸者
漸積而至於此也旣謂之漸則其幾微之間有先見而

人莫之覺者乃禍福之所由分而辨之不可不早也此責君父當慎微也

約說曰順即馴致之義霜而至於冰小惡而至於大皆順長而馴致也此坤之初也而聖人極言之如此正欲人辨之於早也 王伯厚曰易言積善曰家大學言興仁與讓曰家可以不正乎又曰坤曰早辨解曰夙吉治之於未亂爲之於未有在周子謂之幾在張子謂之豫

直其正也方其義也君子敬以直內義以方外敬義立而德不孤直方大不習无不利則不疑其所行也

按直方二句是說六二已成之德工夫全在敬義二字
朱子曰直是直上直下胸中无纖毫委曲故謂之正方
是處事皆合宜截然不可移易故謂之義內何以直只
主敬而內自直矣外何以方只協義而外自方矣陳潜
室曰不言正以直內而曰敬者蓋木欲則心必正敬則
心起精神不令放倒乃是正以直內處義是把吾心做
個應事應物的尺寸區處停當毫不差謬是爲義以方
外敬即正中之警惕義即敬中之條理敬義既立其德
盛矣潘雪松曰一行之脩一善之具謂之孤又或專於
涵養而應用則疎或曉於事宜而存養則缺亦謂之孤

惟敬義立而德不孤此所謂大也无所用而不周无所施而不利孰爲疑乎林次崖曰疑是滯碍也如欲直則未能直欲方則未能方心欲而力未能赴之是滯碍也亦由工夫未至純熟故也所以必待學習也學習就是敬義工夫不疑其所行行字就是六二之動的動字朱子曰義是心頭斷事底心斷於內而外便方正萬事自各得宜然須要又屬敬內孟子曰義以行吾敬君子敬存而心自直義自行外自友表裏洞然事理渾一更无毫髮之疑此所以不習无不利也 洪覺山曰所謂敬義者敬焉而已爾義焉而已耳順吾廣大之自然初非

有所作爲而至之故能不疑其所行蓋承乾之知以行也

程敬承曰立字最難體認人只一心被許多人欲牽扯便覺立脚不住內直則旁引不得外方則移動不得不能引與不能移合更無東西走作去處是之謂立朱子曰二者相夾持要放下霎時也不得只得直上去故便達天德張陽和曰乾只一畫工夫只有誠一箇坤有兩畫工夫便有敬義兩件夫子語顏子只是一箇克己復禮語仲弓便有兩個敬恕所以謂之乾道坤道之別陸庸成曰誠者乾之道也敬者坤之體也仁者乾之行

也義者坤之用也以坤六二乾九二參看乾二爻曰存誠此曰敬乾二爻曰仁行此曰義微矣哉 楊止菴紀聞曰二五皆言君子內可爲直內方外之君子外可爲黃中通理之君子其德同也

陰雖有美含之以從王事弗敢成也地道也妻道也臣道也地道无成而代有終也

張幼子曰爲臣之道有大美而不能含韁者矜也有大義而不從王事者吝也從王事而自有成功者驕也禹之不矜伐周公之不驕吝得六三之義

程敬承曰此節妙在含之二字曰含之以從王事是事

主之自王而我特從之非才不足分有所不敢成耳洪
覺山曰弗敢成者含美也非但不敢居其成功當事始
而有自專自必之心皆成也唐凝菴曰夫天不施地
亦无由而生其成功本非坤之有也爻言無成文言釋
之曰弗敢成也盖原坤從陽之心也操懿芥溫之惡皆
一敢心成之耳爻言有終文言釋之曰代有終則併其
終亦非坤之所自有也終乾之所未終也

天地變化草木蕃天地閉賢人隱易曰括囊无咎无譽盖
言謹也

章氏曰陰本閉翕至四宜變一闔一闢陰陽交通天地

變化則生氣暢而草木蕃四居陰上而又重陰則天地
閉隔賢人隱遯所以易曰括囊无咎无譽盖言謹也不
罹於咎難以事指也无得而稱不以善名也慎之至也
象謂之慎文言謂之謹所以致重陰之戒者深矣 吕

伯恭曰人與天地萬物同是一氣泰則見否則隱猶春
生秋落氣至即應間不容髮若謂相時而動則已屬兩
事矣所以獨稱賢人隱者盖衆人強自隔絕故與天地
之氣不相通氣至而覺者獨賢人而已 張雨若曰變
化閉塞即數百年内天地大氣運乃泰否之謂草木蕃
者所謂朝廷旣治庶類蕃殖也 唐凝菴曰乾初之隱

隱于无位坤四之隱隱于有位无位則在是非得失之外而不易不成也易有位則在是非得失之中其无咎无譽也難非其戒慎之心時刻操持極其謹密何以能之謹非徒能隱其身也隱其美也然觀六五方云正位則知六四亦猶乾之九四雖出而未當事任時猶可以括而括者也

君子黃中通理正位居體美在其中而暢於四肢發於事業美之至也

程敬承曰此章專重黃中作主通理黃中自通理也惟黃中故能正位而居體推黃中故能暢四肢而發事業

美之至也。極贊中德之妙。

蘇紫溪曰：黃土色居中，是歛其至色而渾然在中，乃不顯之文也。然一中可以貫天下之道，雖渾然中存而條理畢具，故曰通理。通是統體，理是統體之節目。朱子嘗謂冲漠之中而萬象森然畢具，萬象畢具處是通萬象森然處是理，只此一句想像便是分曉。陸庸成曰：通理者一心之內，具有彌綸方成爲中，是至順之所出也。程敬承曰：正位居體，雖云至順，要以五居上卦之中，正位位乎中也。安見宅中建極之主而不御下有體者體乃條條件件恰好正當之謂，亦居中之體也，不必泥本。

義下體下字合上文觀之中美德也黃而曰中是美德
在中也在中之美其精神盎然其經緯森然鬱而必暢
積而必發四肢事業通理之符也无美爲美乃爲至美
雖然美之至猶可名也孰與乾九五飛龍在天之无可
名耶物所共覩其上治之功无待發揮矣

胡雲峯曰二之直内方外是内外夾持兩致其力到五
之黃中通理則内外通貫無所容其力矣

潘雪松述曰六五陰居陽而陽不散故曰美在其中陽
明内蘊陰體虛含自中自正自卑自恭自有四肢充暢
之容理之通者動於體也理不中通神不完體四肢皆

形骸之牯不爲吾用矣通暢發揮雖在坤而實本之乾
故美與三同而中德爲尤盛也 又曰三爲坤之全體
猶在上卦之下故雖美而含之焉耳若五則暢而發揮
之矣正所謂以時發者也 唐凝菴曰美積于二之中
發于五之中美誠无以加矣故曰美之至也或曰于此
尚有含乎曰已發者發矣發發者固不與之俱發也
陰疑於陽必戰爲其嫌于无陽也故稱龍焉猶未離其類
也故稱血焉夫玄黃者天地之雜也天玄而地黃

潘雪松述曰天下未嘗一日无陽坤純陰之卦陽實主
之上六陰之盛極也陰極陽生陽動而微陰進而抗故

云龍戰于野曰野者陽始下生非居中用事之時也主戰者陽而曰陰疑於陽必戰明陰之爲逆德而陽之能自強也

章氏曰凡戰必兩者相敵純陰果何戰乎上六陰極必交於陽故戰不言坤戰而言龍者爲其嫌於无陽也故稱龍焉純陰有无陽之嫌其實坤行至亥下有伏乾故稱陽於極陰之時稱龍於牝馬之類即今之十月而謂之陽月是也猶未離其類也故稱血焉氣陽而血陰陰之類有血血之辨有色言血爲陽所傷而見血也旣戰且渚未判其類故稱其血玄黃洪覺山曰其血玄黃者

陰傷乎陰陽二者俱傷乎血陰類也陰自傷也陰自傷而陽生焉故玄而黃也 莊氏曰上六兼有天地雜氣故其血玄黃陰氣既盡則天自天地自地玄黃之色一定不易蓋陰於是乎終而乾又始矣蔡汝棹曰在初曰辯之不早辯在上曰陰疑於陽必戰辯則不疑疑由不辯也

胡雲峯曰上六六三皆揭以陰之一字三曰陰雖有美含之猶知有陽也上曰陰疑於陽必戰則與陽爲鈞敵矣天道不可無陽故稱龍於盛陰之時存陽也戰而俱傷在臣子雖罪不容誅在君父則宜早辯也 張雨若

曰爲字嫌字皆從周公說稱龍則存陽之名以扶其衰
稱血則彰陰之類以抑其盛玄黃雜明陰之无利於抗
陽玄黃分見陰陽之終不可得而易聖人扶抑之意微
矣

程敬承總論曰此卦上下皆坤順之至也順則利於從
陽而不利於抗陽初言當慎防其微也四言當謹懼其
害也從陽故三含其章蓋臣子之職不敢成也抗陽故
上疑而戰然玄黃之分不可易也二居下之中而直方
合焉故其道光五居上之中而通理渥焉故其德美是
中也亦順也倘所謂順之至者其二五兩爻乎嘗取坤

之六爻合乾論之亦各有相配者象潛龍護微陽也象履霜防微陰也謹信兼成與敬義夾持寧有二德乎體乾道而惕守坤道而含寧有二心乎重剛故當革而疑疑故无咎重陰故當闕而括括故并无譽九五居乾之位而曰飛龍曰上治乾大之義也六五正坤之位而曰黃裳曰至美坤至之義也陽窮於亢陰窮於戰其窮則變變則通之時乎用九而无首用六而大終其貞復元陰復陽之妙乎合而論之陽欲其常存陰戒其漸盛而坤之六爻循惓惓謂其利於從陽不利於抗陽聖人扶抑之意深矣

屯

䷂

震下

蒙

䷃

坎上

陸庸成曰乾坤之後即繼以屯蒙何也蓋天開于子地
闢于丑人生於寅是三才之始也惟天地開闢之初而
人值其時爲洪荒之世故曰屯爲混沌之民故曰蒙屯
者世之蒙蒙者人之屯可見屯非兵爭雲擾之謂乃未
開治之天下故曰草昧蒙非私錮物蔽之謂乃未學識
之赤子故曰童蒙象旨屯言乎其君道主震之一陽蒙
言乎其師道主坎之一陽天祐下民作之君師也君師
之道皆利於貞屯者始難之卦也天地之始闢萬物
之始生國家之始造皆至難之時故曰屯者物之始生

也物之充牣事之繁劇亦人之所難處故又曰屯者盈也

屯元亨利貞勿用有攸往利建侯

潘雪松述曰卦震動而遇坎險動而遇陷動而未暢故爲屯乾坤定位混沌初開震爲長子始出用事以濟屯難主初一陽言也故屯乃元亨初陽得正所以能濟故利貞勿用有攸往利建侯皆初九之象勿用者屯難在前不可輕用以徃王註所謂徃益屯也民得主則定震一君居內而主二民侯象也

程敬承曰元亨利貞天德也屯爲人道之始人始生而

五性具故亦有其元亨利貞但陰陽已具不可分爲四德有大亨之道而利於貞耳惟貞故能以至正正天下之不正也不貞非獨是有些苟且凡急躁不寧耐亦是游讓溪曰世難方殷毋爲禍始故勿用有攸往而又何以利健侯將以求往也當其時不可往得其人則可往彖曰屯剛柔始交而難生動乎險中大亨貞雷雨之動滿盈天造草昧宜建侯而不寧

按屯之主爻在初九故始交指震張清子曰乾坤之後一索得震爲始交再索得坎爲難生合震坎之體而爲屯也又其義爲動乎險中能動是其才足以有爲故得

元亨任險中則其時猶未易爲故利貞蔡虛齋曰動未
便能出險之外只在險中而猶能動不爲所束縛耳震
爲雷坎爲雨皆陰陽始交之所爲雷雨交作在在滿盈
萬物萌生屯而未達之象屯者天地造始之時也造始
之時草雜冥昧衆力並爭民無所定其時一陽動于下
衆陰之所歸者宜建之爲侯以收拾人心也然不可道
建侯便了更須戒懼不自以爲安寧方可蓋建侯之後
尚有許多亨屯事業所當竭心力輔真主以晷之勿如
漢將一立更始便日夜縱情聲色也必如是而后可以
大亨貞陸庸成曰利建侯動之大也貞之道也經綸之

寄也。洪覺山曰：不寧者，震險之心也。

程敬承曰：彖中連用二動字，總見坎之貴動也。君子經綸，正其動乎險中處。

象曰：雲雷屯，君子以經綸。

程子曰：陰陽始交，雲雷相應而未成澤，故爲屯。潘雪松述曰：屯難之，世人皆惶恐喪沮，不敢有爲，不知正是君子經綸時節。經者立其規模，綸者糾合而成之。此開物成務之道。紬繹圖爲以解世之桎結者，雲雷屯則醞釀，震然後雨澤降而天地霽，經綸密則謀慮熟，然後紛紜定而世道寧。經綸即定天下明名分裏面事，又曰坎不

言水而言雲未通之意郭子和曰坎在上爲雲故雲雷屯在下爲雨故雷雨解 洪覺山曰朱子曰屯需皆陰陽未和洽成雨之象然需是緩意在他无所致力只得飲食宴樂屯是物之始生象中初出欲破地面不无齟齬故當爲經綸經綸雲雷之意不云雨而云雲者欲雨而未成也聖人代天理物以濟成一代之治其機在此而已洵詞曰國主於侯人主於心故經綸從心上起所以治屯也

初九磐桓利居貞利建侯象曰雖磐桓志行正也以貴下賤大得民也

君子之濟屯要有才有志有位有助初陽是才而在下則無位居動體是志而應陰爻則无助如何濟得天下事以故遲回却顧有磐桓之象人情到此便易失守一失守非惟無以濟天下而先失其所以濟之之具矣故利居貞陽剛有主宅心以靜不以艱危之後乘利擇便而失其正也然而天造草昧君子終不能愬然初九以陽下陰爲民所歸候之象也從民望而建以爲侯則可收拾人心而平世難矣易述曰居貞即利貞勿用有攸往卦言利建侯者其事也利於建初以爲侯也爻言利建侯者其人也初之才利建以爲侯也或云不曰君而

曰侯則未可以君天下爲侯也。君天下者五也。顧陷於險而掩于陰二之柔德不足當大任。必侯初以爲群陰之倡耳。周用齋曰：初九非自建侯也。蓋占得此爻者。利建如初九者爲侯耳。若謂自可建侯。則是自加九錫殊禮之類。不可訓矣。

程敬承曰：居貞者時之所限不可躁也。建侯者民之所屬不可違也。建侯非躁動者所宜。惟居貞者利焉。則居貞乃濟時之本也。又曰：貞者正天下之具。居貞居之以待時而行耳。非忘世也。故曰：雖磐桓志行正也。正而曰行不欲屯膏之意。要緊看一志字。惟志欲行正故能以。

貴下賤而盡心力以濟下民之屯。方屯難之世民思其
主之時。一有聖哲君子能爲之造命立極。孰不望之如
父母而來歸。不但得民而又大得民也。張雨若曰大
宗從屯字來。所謂今時則易然也。洪覺山曰利建侯
者利居貞之謂也。夫非自利也。群陰歸仰于初而初能
下之以大得民心。故其才其時宜矣也。陸庸成曰象
曰勿用有攸往。故初之居不輕往也。二之班不得往也。
三之幾不可往也。四亦班如而曰往吉者。蓋其求婚媾
也。所謂建侯非乎。求得其人可以往矣。故象獨以明歸
之也。凡陽爲馬。初三五皆陽而乘之者。皆有乘馬之象。

故二四上全取焉

六二屯如遭如乘馬班如匪寇婚媾女子貞不字十年乃字象曰六二之難乘剛也十年乃字反常也

二與五自是君臣正應但下乘初九爲初所難故欲進不能有屯如遭如乘馬班如之象爲初九難曰屯難而不得進曰遭乘馬班如正申屯遭之意然初之求二不是要害他正見他賢能欲取爲已輔以濟時艱耳陸希聲曰初雖難二非欲爲寇以二近已欲爲婚媾康屯之情可以見矣但二柔中之德守其女子之貞而不許字謂不字於初也十年乃字字於五也乃字甚有味非至

十年之久不得字也貞之至也着匪寇句見女子不字之難着十年句見女子不字之堅十數之終也又坤數爲十女子者明未有所從也剛不是論他德只據他所乘之位言之二與五應本是常理爲初所難便失其常了十年乃字則君臣相遇而復其常矣謂之反常明相遇者乃其固然幸之也 王註屯難之世勢不過十年者也十年則反常則本志斯獲矣

六三即鹿无虞惟入於林中君子幾不如舍往吝象曰即鹿无虞以從禽也君子舍之往吝窮也

潘雪松述曰六三居震動之極非陽而居三無德而有

求民之心無應而舉濟屯之事即鹿无虞象也趙汝楫
曰田者必夷其險阻虞人設驅逆之車使禽趨田然後
有獲无虞不驅禽即我我反從禽以我從禽故曰即鹿
也鹿善走險逐即奔林禽不可得惟入于林中有陷而
不得出之象蔽于所欲即陷害在前莫之覺矣仲虎曰
幾動之微六三互體艮止聖人於震之動而猶庶幾其
知艮之止故曰不如舍欲其止也曰徃咎戒其動也聖
人欲示人免害之端故提一幾字以喚醒人也 洪覺
山曰虞主苑囿之人无虞者三六俱陰无應也无虞而
即鹿是徒從之耳從入而入于林則不可復拔惟當未

入之始幾而舍之何以幾也凡人動極宜思遇險宜思也六四居正自知柔德不勝而能求媾于初以往不惟自知且知人幾也

一說虞非虞人乃商度之謂更詳之

程傳曰從者以身殉之之謂從字重看是心貪乎禽也貪心勝故雖無應而不免躁動是无虞之由也從禽便是即鹿鹿者幼而奔貴之喻爻言不如舍辨之審也傳言舍之去之決也質卿曰君子只看見幾不如就舍一往便吝更無商量

六四乘馬班如求婚媾往吉无不利象曰求而往明也

潘雪松述曰六四應初故乘馬也欲進與初同事以濟
屯也當草昧之初身在坎險欲進而不前有乘馬班如
之象初爲得民之侯以四正應求以爲婚必得媾合所
以往吉無不利吉以剛柔相得之善言利以濟屯之功
言

仲虎曰凡爻例上爲往下爲來六四下而從初亦謂之
往者據我適人於文當言往不可言來如需上六三人
來據人適我可謂之來不可謂往又變例也四求初九
之賢往以濟屯與即鹿无虞者智愚異矣故象贊其明
九五屯其膏小貞吉大貞凶象曰屯其膏施未光也

胡雲峯曰六爻唯二五言屯二在下而柔五剛而陷於柔皆非濟屯之木二曰屯如時之屯也五曰屯其膏可以施而不施是自屯之也又曰卦有二陽初陽在下而衆方歸之時之方來者也五陽在上而陷於險時之已去者也時已去雖陽剛亦無如之何矣故凶 潘雲松述曰膏者坎爲雨也詩謂陰雨膏之卦坎在上爲雲而不爲雨屯膏之象九五剛中居尊雲行雨施以澤萬方斯其事矣而時方在險掩于上下之陰有膏澤而不得施此屯之所以屯也夫既屯膏而不得施僅僅小補可耳安能大有所濟乎此時初九方大得民於下大事已

去而徒求正應之六二以爲貞難免凶矣

程敬承曰君子經綸大人之事而以望之屯膏之九五必不能也故雖爻位得正下應六二而貞亦不免于凶何者大事以得民心爲本屯膏則無以收人心而安能濟大事程竹山曰小者必貞而吉大者雖貞亦凶甚言不可爲也陸庸成曰小貞大貞寧有二哉但用之小則猶吉用之大則不免于凶何也屯其膏故也小惠猶可偶及而至仁不能博施故又曰施未光張清子曰光陽光也五陽德本明以陷于坎中爲二陰所掩如雨爲密雲所蓄故施未光

上六乘馬班如泣血漣如象曰泣血漣如何可長也

呂東萊曰亂極則當治屯極則當通上居屯之極正是
一機會然六以陰柔居之雖欲有爲而才不足坐失幾
會故乘馬班如泣血漣如也又曰何可長者蓋屯極之
時若不變而爲治即入于亂亡只有兩件更不容停待
潘雪松述曰上六乘馬班如與二爻四爻不異二與初
比事定而從四與初應待求而往九五君位已定乘馮
班如將何待乎屯道之窮無所歸命故泣血漣如泣者
無聲而出涕血者出涕如出血也漣如泣貌此與比後
夫凶義同又坎爲血卦故有泣血之象 蘇紫溪曰四

應初也故乘馬而吉二應五也故乘馬而遭上乘五也故乘馬而泣

蘇紫溪總論曰夫屯豈易濟哉無志者既重發而喪其功有志者又輕爲以至于敗無才者既不足爲天下用其有才者又剛愎而不能用人此屯所以不濟也三之欲往豈曰無志而輕舉妄動是賈禍也上窮則變豈曰無時而萎蕪不振是自貽之感也五則時不利矣勢不便矣即有守貞不字之援而竟不足以相濟矣必也其初之得民乎其四之求士乎汪咸池曰五坎體陷而失勢初震體動而得時故初爲屯主而曰利居貞利建侯

至九五但曰屯其膏

二應五則遭如不能進上遠初而處卦終此所以泣血
漣如也大抵能動則亨已陽剛則動已陰柔而資陽剛
則能動不然者即鹿泣血而已

蒙三三坎下

象旨屯言乎其君道主震之一陽蒙言乎其師道主坎
之一陽天祐下民作之君師也君師之道皆利於貞艮
爲山爲止坎爲水爲險山下有險遇險而止莫知所之
蒙之象也程傳曰水必行之物始出未有所之故爲蒙
及其進則爲亨義經繹曰物始生爲屯天之元德存焉
旣生而蒙形生矣蒙必亨而不足於元故不言元王

伯厚曰聖人教人用蒙而不用復蓋復者去其不善而復於善也若蒙則無不善亦未有所失也

蒙亨匪我求童蒙童蒙求我初筮告再三瀆瀆則不告利貞

蒙亨蒙者亨也亨不終於蒙也蒙之所以得亨在發蒙者之有道耳匪我以下皆發蒙事初筮再三只形容誠不誠非問一次厝次也

按穉而未達曰蒙蒙者人之初正是渾金璞玉一般未彫未琢其可開發處正在此故發蒙者非能有加于蒙蒙者所性不昧皆欲自明如鄙夫之問正其志應而求

我之處中庸所謂以人治人是也此匪我求童蒙童蒙求我之說也初筮重初字蒙之初心惟一者誠也可告者以誠感也再三則非一之初矣真已鑒而失之瀆矣豈瀆而猶可告乎然而不告亦未必非教也楊廷秀曰未達而求達也一問答而加多不達而求其達者百問答而加少初筮而告達其蒙也再三而不告亦達其蒙也一告而達則悅再三而不告則憤安知憤者之達不深于悅者乎楊止菴曰坎爲水爲瀆瀆者衆水所歸煩雜混淆之意人心有所混淆不能如初之專一則再三矣故曰再三瀆蔡介夫曰我一自謂也教者无

求於學者學者有求於教者而后師保之道尊學者之
求教也如叩神明而不瀆教者之告學者達其成心而
不以言瀆然后師保之言入利貞者蒙之所利與發蒙
者之所利惟貞而已矣

程敬承曰童蒙求我蒙非童不求也初筮告蒙非童不
初也曰利貞蒙非童不能範之於正也此雖是語教者
亨蒙之道其實蒙惟童則亨此童蒙之所以吉也

彖曰蒙山下有險險而止蒙蒙亨以亨行時中也匪我求
童蒙童蒙求我志應也初筮告以剛中也再三瀆瀆則不
告瀆蒙也蒙以養正聖功也

朱子曰山下有險險而止險在內止在外自家這裏先自不安穩了外面更去不得便是蒙昧之蒙

按艮止山也止在內險在外見險而能止則蹇止在內險在外自險而未能達則蒙蒙然不知所向往蓋非愚昧之蒙乃童稚之蒙也何害乎亨也知識雖未開而天真具在有可亨之道焉但恐亨之不得乎時之中耳志應養正告不告皆行時中之謂蓋非亨行必不能以正養非時中必不能及其蒙而養之也童蒙之來求我志應故也志不相應其蒙未可發也志應只是五之志應二然古之教人雖不區區先求學者但就不求之中

自有感發之理故下一應字剛中不必分剛而且中自然告而有節而瀆則不告可知矣。洪覺山曰初筮初心誠也初筮者六五在中而求于二真一之心也然有群陰在焉未免再三之瀆再三之心即瀆心矣如能靜以待之猶有可清之理而我乃復眎之以言是我瀆汨其蒙也夫人所以可至于聖者以有此蒙耳蒙與聖同養正者養蒙之初心也瀆之非養正矣

程敬承曰蒙可發也不可瀆也初筮而告發其未發之初心也再三則心非其初矣彼既瀆而我復以言瀆之難以導而還之於一矣故惟不告則不瀆不瀆其心使

之一於誠也不屑之教不可謂非亨蒙之道也又曰蒙初自有良知良能元來是正的養者養此也非蒙有不正而養之正也故不曰以正養蒙而曰蒙以養正聖功也謂蒙心完然一聖人聖人亦不失其蒙心而已然則養蒙以明失其道矣

陸庸成曰蒙非蒙昧也昧何以亨蓋蒙者人之初也其覺性在中聖人之全體已骸而領矣但內若險而外若止蒙而未開也有以開之則即險之處逢不竭之源即止之處寓不遷之極如磨鏡者去翳而明自現非始有明也故爻曰發蒙發其在中者使蒼耳曰包蒙包其所

固有者使自得耳曰擊蒙擊其所本無者使全其良耳就童心可証聖體而養之以正便是聖功是真能以亨行時中者也亨得其時之中則行不得其時之中則不行時中者乘其鬱極所通而施當其機因其深淺而各隨其候之所至此先覺之任非剛中如二者不能矣養正之功全是涵育機括非督責之謂故狀蒙之象則曰下山有險象蒙之功則曰山下出泉泉出于山下其源也達于四海其流也聖功不于其流于其源此果行育德之功養之必于蒙也

象曰山下出泉蒙君子以果行育德

唐凝菴曰山下出泉其源未遠其流未遠有蒙象君子
觀其流未遠而有必達之勢則以之果其行其源未遠
而有可養之機則以之育其德果決涵養多不能兼欲
進德者必兼之而後可洪覺山曰果者剛中也泉之初
出其勢必行君子體之果行以育其德育者靜止意也
育其所本有猶泉之本生生者乃德也初則果再三則
不果一則育二三則不育自養其蒙之道也 潘雪松
曰天命之性山下之泉也溥博淵泉盡性之聖也果行
育德作聖之功也 蔡虛齋曰楊墨之行非不果也而
非吾所謂行佛老之德非不育也而非吾所謂德故曰

蒙以養正聖功也 王伯厚曰充善端於蒙泉之始絕惡念於履霜之萌有味哉

初六發蒙利用刑人用說桎梏以往吝象曰利用刑人以正法也

唐疑菴曰初六雖不若六五得中然亦止于氣稟之拘未嘗涉世而鑿其真其蔽可以震而發之者故曰發蒙發者發其初心也蒙愚無知告之未必喻引之而屬違非威之以刑莫能從也故發蒙之初利用刑人然而刑弗可專用也若一于用刑而不輕舍之則教雖善亦無以入蒙雖畏亦無以發苟免無耻治化不可得而成矣

故以往則可吝。孔疏：利用刑人者，以正其法制，不可不刑矣。故刑罰不可不施於國，而鞭朴不可不行於家。程傳曰：發蒙之初，遽用刑人，無乃不教而誅乎？不知如法制刑，乃所以教也。蓋後之論刑者，不復知教化在其中矣。

程敬承曰：蒙之初曰發初，故易發也。家人之初曰閑初，故易閑也。彖云養正而初曰正法，法以濟其養之所不及也。要之用說以觀其后，則養之意自寓於法中矣。九二包蒙吉，納婦吉，子克家。象曰：子克家，剛柔接也。

潘雪松述曰：九二得中，以亨行，時中者也。有包蒙之象。

發蒙全貴於能養包蒙者養蒙也明足以達蒙之心包
含而巽入之吉道也納婦者所以明包蒙之意如納婦
然謂納之化誨中也以明容暗暗亦可明賢愚僉受曲
成不遺故兩稱吉包與納二虛能受之象克九剛能任
之象以二應五任內起事克家之象

陸庸成曰剛柔接者二本剛而五以柔接之乃能師道
立而善人多接不但禮貌直是順以巽之之謂 質卿
曰人之至親無如一家至愛無如婦而至所親信者莫
如子包蒙者以納婦之心處之何蒙之不受其益任人
者以親信其子之心信之何發蒙者之不能克家紀聞

曰剛柔有上下之分故屯二之於初惡其乘剛柔有往來之情故蒙二之于五喜其接五柔接於二求我之義也此正見五之志應處要之皆以二之剛中得之

六三勿用取女見金夫不有躬无攸利象曰勿用取女行不順也

九二包蒙如納婦得亨蒙之道也蒙如六三發之不能包之不可非可納之婦矣故戒之曰勿用取女六陰象女而居陽位柔暗而多僻躁動而易邪女之見金夫不有躬者也以女而懷二三之心則失其所以爲蒙而求我之心亡矣如是之人二旣勿取上且擊之何以利哉

勿取即不告意示不屑之教也象曰行不順也女子所
持者身待求而應不二其行是之謂順若乃見利輕忘
其身則逆行也故曰勿用道之棄也 又云上下四陰
爻皆因二以起義五應二則爲童蒙之吉初承二則爲
發蒙之利四遠二不明者也則爲困蒙之吝三乘二不
順者也不以蒙待之故不言蒙 李九我曰二納婦三
勿取女見質弱者猶可教而爲利誘者難與入道也
六四困蒙吝象曰困蒙之吝獨遠實也

潘雪松述曰陰資陽以爲明者六四陰居陰位而上下
又與二陰相比獨遠於陽闇莫之發故曰困蒙質卿曰

欲自振之。則限于師友之無助。欲自安之。則病於心息之未寧。惟求通故知困。惟思明故知蒙也。人心不通明。即爲鄙吝。然知困亦一機矣。彭山曰。困亦卦名者也。與蒙相似。皆以內體坎險。有以柔掩剛之象。但外遇兌則爲險。而說說有徐通之意。因之而名困。卦遇艮則爲險而止。止有靜養之意。因之而名蒙。其別如此。然困甚於蒙也。

陽謂九二之陽。陽稱實也。曰獨遠見。初三五之不然。六五童蒙吉。象曰童蒙之吉。順以巽也。

王註五以陰質居尊位。不自任察而委於二。付物以能。

不勞聰明功斯克矣故曰童蒙吉

敬仲曰六五象童蒙是內無知識之萌外無聞見之雜蒙者之求而有初筮之誠者也故爻莫善於童蒙艮爲少男故象童蒙唐疑菴曰童蒙不待繫上不必更有所開發只保其本然遂可爲聖矣故吉王伯厚曰童蒙應於二之剛則吉養之早也童觀遠於五之剛則吝見之小也

程敬承曰六五好處全在一童字惟童故赤子可以作聖亦惟童故能虚心一志以應九二順以巽童蒙之吉道也易述曰六五柔順有應於二動而成巽順則以陰

從陽巽則善入。若順而不巽。則從而不改。說而不繹。雖是明師。亦无可成之理。此六五所以兼巽順之德而獲童蒙之吉也。

上九擊蒙不利爲寇利禦寇。象曰利用禦寇上下順也。

張甫陽曰。諸爻皆蒙其不蒙者。惟二剛二以剛居中。包蒙以開其善。上以剛過中。擊蒙以懲其惡。易述曰。上爲蒙之極也。蒙極教道窮矣。故至於用擊。蘇子瞻曰。發蒙不得其道。而至于用擊。過矣。故有不利爲寇利禦寇之戒。三爲坎盜。而上九應之。有寇象。擊蒙過當。非我爲寇乎。寇蒙則我反失道。而蒙反成頑。不利孰甚焉。艮止能

止坎水有禦寇象但去坎險之爲蒙賊者使內惡不萌

外誘不入而蒙德成矣蒙之利莫大焉利亨也

或曰擊蒙

擊三也三陰柔不正心寇也爲寇不利於蒙故擊之擊者攻而禦之也寇禦則蒙利矣更詳之

紀聞曰蒙至于擊則繼之以怒矣教其未裕乎蓋包者容其發之所不迪擊者攻其包之所已窮發之之蚤而包之之極然猶蒙而不化以至於擊教之成有如王制所云不變者斯擊之矣

胡雲峯曰上之剛不爲寇而止寇上之順也下之人隨其所止而止之下之順也上之順順在施非益其所本無下之順順在受益還其所本有或曰發蒙者利於初

過此以往其習已深雖欲止之亦吝而難脫其勢必至於桎梏也故刑之於初者正法以示之而有餘正之于后者干戈以禦之而不足

楊止菴曰二包納治之以寬上九擊治之以猛教之尚寬而有三匪人間之于中即治之以猛所謂相濟以成教者也

程敬承曰蒙之初利用法防寇於早也法而曰正雖過督不妨教化矣蒙之極利用擊持法於終也擊而曰順雖過剛不碍包容矣

程敬承總論曰發蒙教之豫也包容之廣也發之弗

喻容之弗入則用擊擊亦道之順也此爲教者言也若以受教者論五之童蒙赤子而可作聖者也初六蒙始而易開法猶可懲也六四蒙困而思憤機猶可通也獨六三蔽於利欲童心盡喪蒙質盡漓發之不可容之不可象取勿用棄之也不屑之教是教之又一術也